

耳目心書一二三

青壯館全書
二十三

銅卷藏

共三十五



青莊館全書卷之四十八

耳目口心書一



青莊館全書卷之四十八



青莊館全書卷之四十八

完山

李德懋

懋官

著

男光葵

奉杲

編輯

德水

李晚秀

蕙隣

校訂

耳目口心書一

往在庚辰辛巳冬余小茅茨太冷噓氣蟠成冰花衾
領簌簌有聲以余懶性夜半起倉卒以漢書一帙
鱗次加於衾上少抵寒威非此幾為后山之鬼昨
夜屋西北隅毒風射入掀燈甚急思移時抽魯論
一卷立障之自說其經濟手段古人以蘆花為衾

是好竒又有以金銀鏤禽獸瑞應為屏者汰侈不足慕也何如我漢書余魯論屏造次必於經史者乎亦勝於王章之卧牛衣杜甫之設馬韉也乙酉冬十一月二十有八日記

稚弟鼎大方九歲性植甚鈍忽曰耳中鳴錚錚余問其聲似何物曰其聲也團然如星若可觀而拾也余笑曰以形比聲此小兒不言中根天慧識古有一小兒見星曰彼月屑也此等語妍鮮超脫塵氣非酸腐所敢道

無論經史子集首卷色必垢暗甚至敗剝不堪讀雖

年久者自次卷以下至于末卷其新如拭余每嘆
世儒無耐久心凡書嘗試讀首卷若可牢確者而
匪久輒厭仍拋之自第二以下則未嘗轉眼觸手
故首尾之新舊判為異物不污鼠溺則必資蠹飽
書籍之困厄極矣且近見誰家裨海一帙皆赫赫
若手未嘗觸者而獨宣室志酉陽雜俎異聞總錄
等書皆油暈垢蝕若拔自烟窰中此數書盡說鬼
譚夢記災錄異故人必力焉坐於無識見而徑好
奇故也雖曰細薄余嘗慨恨

噫天下事有不可不為之者有不得已者有不敢為

者有可為而不為者有無可奈何者中人以下莫不相戰於腦中迷不知其攸歸躁者急著而不中緩者遲行而失時皆未循理而審勢安意而降氣終成敗局長喟短噫而已矣

余靜觀隣叟搗米為屑而歎曰鐵杵天下之至剛者也濡米天下之至柔者也以至剛撞至柔不須更而為纖塵必然之勢也然鐵杵老則莫不耗而挫矮是知快勝者必有暗損剛強之大肆其不可恃乎

奇秀之氣寂然則無論萬品皆墜俗曰山無是氣則

與
似
如

敗瓦也水無是氣則腐澁也學士無是氣則束縵
也方外無是氣則團泥也武夫無是氣則飯袋也
文人無是氣則垢囊也至於虫魚花卉書画器什
無不皆然靈淑精英天鍾地毓得此者貴豈與滓
穢朽臭駢肩接踵哉是故有炯然雙眸一俯一仰
又四顧之先察是氣之銷旺森羅萬象不可遁情
然象外縹緲意中縕緼心了了而口不能言也

終古知行并施者極難何也敏邁者根植不深堅確
者穎鋒不利俱歸病窟然堅確者之固果勝於敏
邁者之空落石公有言曰有聰明而無膽氣則承

當不得有膽氣而無聰明則透悟不得膽勝者只五分識可當十分用膽弱者縱有十分識只當五分用

筆枯筠死免也墨陳膠剝燥也紙敗麻爛穀也硯老瓦頑鐵也何與人精神意想奇變幻化事也今以筆紙墨硯謂似血肉之心色屈伸之腕指眈眈之眼孔則人必不信矣且謂筆肖墨墨肖紙紙肖硯心肖眼眼肖腕腕肖指也則雖明目張膽仰思俯察不其近矣然吾心一寓境觸象若有所為則忽眼為之轉腕為之運指隨以操硯須墨墨須筆筆

下紙似低

須紙紙橫歆仄左右馳驟頃刻飛騰出入變化氣
得意滿無所不可心忘眼眼忘腕腕忘指指忘墨
墨忘硯硯忘筆筆忘紙當此之時呼腕指為心眼
可也呼筆紙墨硯為心眼腕指可也呼墨硯為筆
紙可也及其寂然心收湛然眼定腕指拱于袖拭
墨洗硯閣筆軸紙則俄然之間筆紙墨硯心眼腕
指不相為謀又忘前之周旋矣是知因材收用則
寡婦之茵孝子之衿可策勲於奇疾也氣既合而
又相得則楚之膽越之肝可同照而并投也

古云張乖崖守蜀見老卒抱孩孩戲粹其頰乖崖怒

以為雖孩漸不可長遂殺之趙立出軍以期不至
斬其叔何二人之忍也若卒壓之為也則天下之
孩皆可不釋也箇箇岐嶷儼如成人豈曰孩云乎
哉邈然無覺乍啼旋笑之情獨不可原乎何不戒
老卒使禁之也趙立只知有軍令嚴不顧人倫之
重奚其為人道完也假使敵留其叔如項羽刼置
太公事則是父叔既異可進攻也雖叔因我而死
人不為罪也立則不然偃然高踞于幕俯視其叔
之面縛泥首斃其罪而揭頭于牙旗之上不可以
人理責也卒壓名臣趙立忠臣猶有此大失所謂

人固未知者也况下於此乎

郭巨孝於親以其子嘗奪母食欲生理其子而得金
迺止余駁之曰此偏枯之孝而非純孝也假使巨
母為人悍毒命埋其孫此人倫之大變也巨當委
曲陳達以解其心期致於無過之地可也使巨母
而有常人之情見巨之如此則必哭泣警戒疾聲
而救之矣巨若恐傷母心托以死而埋之母必悲
思不堪亦奈何哉兒若奪母之食則別具一食誘
說多般期于不奪可也若謂巨不孝不可然決非
藹然純孝而剛狠忍人也後人何學焉得金偶然

也

或曰今若有李靈樞左擁王元美右携張肖甫駢謝
茂秦徐子與輩來問於子曰文當擬左傳國策史
記漢書而韓柳以下不論詩當擬建安黃初間元
天寶而元白以下不論或敢脫此法律而出它語
皆非吾所謂文章也子當何荅曰我當曰拘也若
以子之才則可且擇天下之士如子之才而善於
摹擬者駢之以此律亦可然世或有竒逸俊邁幽
脩詭特之倫那能屈首聽君之為而自甘古人脚
下活乎假令聽之雖三昧于摹擬之法反大不如

渠自有渠之文章也如彼者雖無優孟逼摸孫叔
敖手段然猶天多而人少也如子則人多而天少
也文章一造化也造化豈可拘縛而齊之於摹擬
乎夫人人俱有一具文章蟠鬱膏中如其面不相
肖如責其同也則板刻之画舉子之券也何竒之
有亦余豈曰盡棄古人之法也非子之所以縛於
法而不能自恣也法自具於不法之中豈曰棄也
子雖傲視海內自大其壯語雄談而吾恐其流不
勝腐陳而迺劉真氣耳然天地間無所不有子之
善擬古人亦不可無也吾幸讀子集而說以為竒

觀或曰又若有袁柳浪左擁徐文長右攜江進之
駭曾退如陶周望輩來問於子曰文章安有定法
哉理何必先民所恒訓語何必前賢所恒道當快
脫粘縛直段步武門戶則特立而洞天則別開也
或掇拾古人字句豈曰文章名世哉子當何答曰
我當曰拘也若以子之才則可且擇天下之士如
子之才而善於超脫者傳之以此方亦可然天下
之才非超脫而止也有典雅者有平易者壹皆責
之以別創新奇或恐反喪其本然而日趨于高曠
超絕之域不亦敗道乎振作多士之文章豈一律

而已哉無乃局乎仍才竒正自有可觀抑揚與棄
正規暗諷順導反說其變化也無涯但不使之太
剝削其渠之本然與天真去其滲滓腐穢而已矣
且古人執轍不可拘束亦不可專然拋棄也自有
妙解透悟法在人人各自善得之如何耳子紛紛
怒罵以天下人之不一齊從吾命為大憂也則吾
懼其末流仍文害道誣言妄談猖狂自恣至陷於
不可赦之罪不亦悲乎然天地間無所不有子之
善創新語亦不可無也吾幸讀子集而說以為竒
觀或曰子奚取焉曰集二子而各棄其醜焉可也

然方遜志王陽明唐荆川歸震川輩亦文章別派也豈肯受節制於此二子哉蓋于鱗輩雄健中即輩退步矣中即輩超悟于鱗輩退步矣各自背馳俱有病敗然絕世異才振古俊物新羅高麗國終恐無之矣噫

人各於才之局處焉專心若以一部史記言之同一讀也務經論者所見無非成敗治亂之跡其宅不知也力文章者所見無非篇章字句之法其宅不知也業科舉者所見無非尋摘奇偶涉獵奇巧尤不知其宅也是下之下也一切子集稗家亦皆如

此雖有一條之通而非大方也鴻儒則眼目甚長
并行齊進不少窘束磊磊落落如破竹建瓴耳

古文之名目盛行其隋唐以來乎夫名世雋傑各有
志氣精神言語事功發露筆端酬應不已者無非
文也雖有工拙之辨安有古今之分科舉之學既
出後專尚浮虛拘於功令以不入主司之眼為可
懼而始号为時文其定序記論說等文字稍加典
則者号为古文視之為至難底物於是分為二道
文章之真十止八九矣

方二更三更對門隣舍喧笑之聲遠遠時聞而急風

吹靈片從窓隙直射燈影翻翻然墜于現也余時
感舊之心正悲切只將指尖隨意而画爐灰方正
者或肖于篆籀繆結者或近于行草余脉脉終不
知其為何字也忽眉睫如石自顧頰影頰然委頓
時復肅然整襟危坐而致敬少焉凝然仰視屋樑
於是古人之環行危節歷歷從思想來慨然曰名
節可立雖振撼風霜閱歷濤波九于死而同悔也
且人間米鹽零碎諸掛罥之物庶起脫而淨盡植
弟也則無知而偃于余睡聲怡憺甚自得也快哉
余通幡然而悟乎與不平孰愈始低眉拱手讀論

語三四章其聲也初咽澁而終和平胷中澎湃有
鳴鳴漸微鬱律之氣始按下神思清明洒落仲尼
何人也雍穆和悅之詞氣使余麤心剥落銷磨迺
抵于平非夫子我幾放狂走思前之為則遙如夢
也乙酉十二月初七日書

乙酉十二月初九日李正夫來談吐抵夕正夫曰黃
宗羲明末清初人也極博口明人之集無一遺
漏凡一千三百種於是選緝口明文海口明文案
二書尚未刊行而二書中又精選為口明文授讀
以教其子百家云余問曰其所尚大抵何如耶

正夫荅曰廣備百體耳余曰誰文多收耶曰雖王
李大家收入不多多收者方正學王陽明歸震川
輩文余曰是子主意在此正夫曰王陽明 明之
第一人物也其學問雖可疑而事業甚偉耳以大
學新民為親民作親民堂記辨之明詳然密疑大
學引詩書明字新字止字以照應首章三綱領甚
分明若陽明之言則日日新其命維新之新字豈
不泛然乎陽明亦不舉論此段可訝余曰陽明茅
子聞其訓戒則往往感泣何也曰誠意篤實故使
人感動人或以此等處譏其似佛此不知陽明之

甚也。雖佛氏若誠意動人，是可愛。何罪之有？而亦何妨於學問哉？余曰：近者稍稍見元人口，明人所著述，好出奇談，駁朱子解經者多，無乃此輩之感耶？然其引經抑義，頗有可信。如何也？曰：以朱子之精神氣魄，一生註經，已無餘蘊，而猶有後議。然則經書尚未抵定。耶？紛紛之論，亦有可采者。如君子疾沒世而名不稱，本註大意以名之不聞為疾。而陽明則以稱為相稱之稱，蓋君子惡名不副，臬也。沒世死也。若死則無更可為之道。故疾沒世而名實不相稱也。且解四十無聞之聞，不謂名聞之聞。

而為聞道之聞此等處亦□并與本註而無妨也
凡解經著史誤著甚易如史則徃徃尤有不如無
書之嘆如明史記我朝 宣仁二祖處多誣誕昭
布天下人皆信之豈非無謂之甚乎余曰經史不
可不仔細檢覈北齊高緯六月遊南苑從官暍死
者六十人見本紀通鑑誤以暍死為賜死綱目直
書曰殺其從官六十人而不言其故尹起莘發明
曰此朱文公書法所寓且引孟子殺人以挺與刃
與政之說固善矣然其案通鑑誤之于前綱目承
之于後此周密論也馮厚齋解明夷六五箕子之

明夷云箕字蜀本作其字此繼統而當明傷之時
之象其指大君當明傷之時而傳之子則其子亦
為明夷矣因蜀本其字之誤盡疑天下之本反改
而從之尤有所未可此胡一柱論也正夫曰傳春
秋者非左丘明而別一戰國時無名之左氏也明
矣山海經後世緝天問註疏為之非伯益書者明
矣或云志林非東坡書耳余曰程大昌以禮袒免
本是袒裼而免冠別無免義又引曲禮勞無袒冠
無免其義只如此而鄭康成輩創為布條圍首之
說後世儒者固而不改大蓋以此意作袒免辨甚

詳明余意亦深以爲然往者問諸張雲章雲章曰
假使非古禮而先儒連以鄭說行之已久若免冠
則豈不駭俗乎父母喪被髮本西原蠻子之俗也
自唐始行其來已久今若不被髮豈不大駭俗乎
袒免亦猶此也正夫曰布條圍首之禮甚苟簡余
亦疑此久矣然雲章言似不妨余曰免冠有何不
可哉正夫曰雲章又南遊矣退之云憂衣食亂心
雲章奈窮何東國無義氣者忍使雲章窮餓不盡
成其學哉然窮餓中自有工夫雲章其應知之矣
余曰如斯人輩例必貪寒何也近者聞龍山徐雅

士培植家貧而孝于親年少而志于學親操井臼而餘力留心古文詞又勤舉子業有薄田數畝仍毋病賣而買麥云余甚惻之矣昔有二三友生戲以錢財言志問於余曰子若得十萬貫當何以鋪置荅曰何難之有太半買沃田其餘依范文正義庄以給內外族黨之貧餓者又其餘無論親舊與一切宅人有婚喪飢寒疾病患難者散而施之又其餘藏書數萬卷以借賢雋之好學者其買田太半者以其生財不竭之謂也正夫乎余言何如哉正夫曰美哉所言井、有次第此等事入於楊墨

甚易此則不然也是日纔二論討甚廣余隨意書
十之三四云

嬰兒之啼笑市人之買賣亦足以觀感驕犬之相聞
黠猫之自弄靜觀則至理存焉春蠶之蝕葉秋蝶
之採花天機流動萬蟻之陣不藉旗鼓而節制自
整千蜂之房不憑棟樑而間架自均斯皆至細至
微者而各有至妙至化之無邊焉夫天地之高廣
古今之來往觀不亦壯且奇乎哉

世人但知雪之六出而不知霜亦六出余清朝細看
霜有六稜如龜紋而甚均正但不如雪之細雕頗

費天巧耳始知靈霜皆水氣所化遇寒而凝必有稜銳者金木之象也水居中氣結成堅質則上承母金之銳下傳子木之稜分而言之則靈受氣稍輕而軟近木也霜受氣稍重而勁近金也又水之初凝冰能成花竹枝葉之狀其端必尖利雹亦有稜皆霜靈之類也六出者水數也水精及陰精石亦六稜也

乙酉十二月十三日張丈學聖來訪余問郭巨埋子事義理何如曰不可謂不孝而是巨之無識也也是以朱子編小學不收焉又曰近者漸覺古人之

難也酌量其處事則非平人所易辦者甚多如王
子敬家盜入子敬徐曰青氈吾家舊物不可持去
此雖小事不亦難乎且覺人容受人言是進也
以爵之大罪好察通言子曰三人行必有我師嘗
愛李左車亡國之大夫也以韓信之智勇能虛心
師事之亦難矣余前有堅守已見之病今則洒然
務受人言耳余曰此雖甚好然不可不明胸中之
涇渭從其善處而已張丈曰極是極是余問邵康
節稱張留侯狄梁公以能成天下不失其正栗谷
則深譏梁公之事女至烏在其不失其正乎張丈

曰天地間無窮者義理以康節之知識有此論未
可知也退溪論許衡為世道出仕栗谷則曰雖非
失節亦是失身尤菴則稱之以老酋而謂可黜從
享以三大賢義理各異豈可容易言乎然栗谷言
儘好矣余問曰昔韓魏公帳中刺客入請得諫議
首魏公延頸欲受刃盜若下手則將奈何張丈曰
半夜無人刺客忽來到此地頸其受害間不容髮
故魏公非但觀其意而延頸然亦卓乎不及處乎
余曰米苡章甚無味何也張丈曰儘無味然靜想
其家室和平父_二子_一夫_二婦_一其婦人自然無

事出米芾或掇或貯于衣或振其衽其氣
象不亦好乎大抵經書無味中有味余昔讀經書
語皆難澁冷淡太無味如嚼蠟也今則不然閒卷
欣然細嚼之其味無窮矣余曰其謂手舞足蹈乎
曰余何敢至此境乎但始覺無味中有味而已矣
乙酉十二月十七日心溪宗姪光錫來宿心溪曰我
慈親體中每有不安節子心常焦熬於文字上工
夫未由也且無一卷書籍但恐一生如此栖已終
為無聞無識之人而歸矣余曰君言誠是矣余幼
時膽氣稍壯自期言行功業是自家手中物那能

不到古人地位也近日以來漸覺多事歲月太半
傳俄日出而已朝飧俄朝飧而已夕飧俄夕飧而
已昏睡俄昏睡而已日出且其間毛細之事不勝
言矣正如衣敗絮行荆棘中左胷右掛無非煩惱
佛氏初心不耐諸般煩惱脫此敗絮歟然此學已
滅倫矣始知無憂無思父母康寧兄弟和樂衣食
足以安過一生家多藏書而只優遊度日昏惰放
逸不為學問者必是愚夫也至如余者清羸神氣
茶然時多不能如意勤勵見壯健無病甚羨耳心
溪曰余日前從楊州來牽馬僕卽淮陽人也問曰

汝見金剛山乎曰雖見之愚眠安知景趣然始登
斷髮巔則忽然白峯矗出中心自誓以為自今以
後雖一毫事豈可欺人哉愈往而一生慾念淨盡
既遊而歸復登斷髮巔則欺人之心與慾念復依
舊云矣余曰可知雖愚下之民其本心宜惡哉但
在觀感之如何耳心溪曰小學呂氏童蒙訓有巫
祝尼媼注媼牙婆也牙婆是何物余曰牙字牙字
之訛牙字與亘同凡買賣居間者曰牙僧疑是女
人為此事者也今世亦有此等婆耳心溪曰吾妻
之練刺生葛為經此陶菴禮也余曰先刮黑皮去

其中心則其質白而柔矣凡練而用葛云漸降殺耳今君直割生葛則其黑皮自如其中心不去若較諸麻經無乃反麤重耶恐不如用白而柔者之為愈矣然晚生痴騃何敢妄議心溪曰余嘗有一疑凡諸菴服甚重亞於斬衰者也且以義推之自斬衰至總麻皆具首腰經衣裳以居可也今父母喪外皆有時服凡腰首經衣裳不過緦禮時服之此習雖不可改然菴服人時服中添笠甚不可也代以白笠則好矣或謂白笠是禪服喪人之所戴用於菴服無乃不可乎余以為不然禪服比諸菴

服則反輕殺有何逼也東國諸先生其議及此處
否未可知也此義大抵如何余曰極好極好但習
俗猝不可變何哉心溪曰三年喪朔望無叅降則
俗節亦無也或有朔望則不行叅降而俗節則行
叅降何也余曰平時則朔望俗節俱有叅降耳三
年中何必分之而或叅降或不叅降也心溪燈下
讀余諸筆記雜說曰自得處甚多決非俗人也余
笑曰心溪知我勝我自知余以寫出真情為務無
非臆臆間事耳夫文章沁入骨髓可好耳古人云
可與知者道不可與俗人語余每疑此語甚薄而

無忠厚意近日漸覺此語不得已也君之文章不
無疵如余愛其真情流出每多之也心溪曰近日
玩月而吟曰峽天遙夜遠星月動精神余曰此豈
非真情乎奇哉奇哉心溪曰佛氏天堂地獄之說
別無可疑司馬溫公曰佛法未入中國之前人固
有死而復生者何故都無一人誤入地獄見所謂
十王者耶此語甚堅確明白足為斷案耳余曰如
來學問是慈悲耳故憫眾生之多慾多惡或假設
此語以儆戒之耶世人儒者外皆尊佛如天地信
佛如父母元不知如來本無是事而假托鋪張其

禍福如真有是事自以謂如來豈欺我哉或怵畏
者有之歟余見佛寺繪地獄諸般刑戮慘不欲見
古有象刑畫圖五刑之象昭示萬民使之儆戒亦
此意歟心溪見莊大讀曾先之史畧謂余曰此書
甚未備惟東國人孤陋尊崇之此豈教小兒之書
也何不教明人童子習耶余曰童子習太畧不得
已從俗耳東人之孤陋可勝言哉不知資治通鑑
方可為通鑑而呼少微通鑑節要為通鑑至大書
其目曰通鑑則真箇通鑑呼以何名耶或呼以少
微節要則元不知為何書也且以為史書之詳畧

兼備者莫過於此可笑可笑近日教隣兒此書則
始知不成模樣之書耳是故中國已絕無史畧及
節要耳且近日刊文集者首卷元不受人序跋以
弁者甚或首葉旁邊不書某貫某著過了四五十
年後見此集者或不知其為誰書是豈為不朽計
開刊文集為傳後心耶皆甘為亡名氏耳如蓀谷
集流入中國中國人但知蓀谷而不知為李達耳
其詩列之亡名氏此是孤陋之弊耳且如退溪栗
谷諸先生文集豈可局於一隅只有名於東方數
千里之內獨不使昭布天下而人亡知有此賢人

也此等集若齋送中國則必有好事者精刻鮮裝
布之天下矣東人動必譏好事者夫好事者不無
其弊而不可無者亦好事者也心溪曰東人孤陋
中又無義氣中國人則平生著輯或未訖而死朋
友及後生輩不憚勤苦極力續成以就其志且校
閱精覈刻諸梓木不吝貨財使人亡讀而有之此
東人十分不及處也好事者何傷也余曰近日往
往夢中見奇書獲讀欣然覺迺恍惜何也心溪曰
夢之所思夜必夢焉炯菴一生心靈在書故耳余
則奇書之夢眈眈而夜亡夢境擾亂不定既覺未

嘗不可愕可恨可悔可愧耳

往有客咄曰出門都是辱開卷無非羞余曰儘名言耳然撮心于粒踏厚地如恐陷則何辱之有雖有橫來之辱非吾自取也讀書每以實踐為心浹冷骨髓不為皮膜以外物事則何羞之有但日以少有羞焉則非讀書也亦不成人也為工夫耳

面上一痣一紋有無限機關當其媚說于人也瞳子細瞬潛注流轉動盪逸態橫生送之以佳話則洒如甘露煦如陽春其隱然精神無非一欺字也當此之時雖貪如盜跖信如尾生無不茫然心醉此

通都大市猾賈黠僧之一生功力也。鰌如牛吼行如豕突，毛孔骨節無非駁濁，少無開明踈通之氣。惜一絲一粒如惜性命，冠衣未嘗一時正著，對異色人則口呿不語，面頰無聊。其所坐即無識二字也。如斯人也，雖德操之容物方朔之推移必戚眉咄咄。此田農之間埋頭不出之蠢夫也。溺於一偏則不知有何好事，復在此外也。是以善讀書而不喪真心者，奇男耳。彼商賈田農輩何乃自安庸賤而役々乎？嗟々所乏者恥矣。有恥何不可。

余前見霜片如龜文，近又見或如翡翠毛，或下有一

微莖甚短細上必有如粟粒者相聚必六箇皆矗
矗直立大抵著尾者著木者甚微細著茅茨者頗
分明著曝露之敗絮壞布者歷々可數其奇巧不
可勝言余每細玩胷中妙思如蠶抽絲耳靈電之
類亦有數種霑花霜之類也蓋靈電自空中已
成形而下故無論晝夜霜及霑花氣纔着物始
成形而仍粘凝是只乘夜為之故耳且霜只露天
處生了意者氣直下欵霑花大異於霜如簷間
與密處若有木枋茅葦或亂髮簪絲無不綠而生
花此蓋霧氣之類密密塞天地橫溢奔逐雖簷間氣

可通如則橫入而生花耳此亦一奇玩

神氣灑然聰明倍勝有名馬嘶春良鷹掠秋底意思
此時逸氣凌厲驪龍領可探也熒然山可銘也五
岳真形可覩也隔牆針可察也渾天儀地動儀可
鑄也澹菴疏可艸也十三經可疏也什一史可誦
也壽民丹可製也天下被可縫也及其風衝雨吼
之宵神沉氣翳四體若無骨此時可卧而不可坐
可嘿而不可言種々世味皆苦麥黃連熊胆矣鷓
鴒羽不可舉也瘦蚊一嘬則幾乎委頓矣但若有
瀟灑名流不大其聲朗々纖々不急不緩讀清新

視似聽

洒落之文或蔡羽洞庭記素中郎西湖嵩山諸記
如秋蟬曳緒則我其倚枕闔眼而耳視稍可意耳
余稟鍾太弱神氣不好時太平最不嗜聲聒只拱
手歛膝坐靜室則有無限意趣古人衛洗馬沈家
令以瘦骨鳴然應不如吾之太清也是知先輩名
世者氣魄健邁且饒無限聰明故做事大過人也
古人有生八十者未嘗一日言病壯哉余病矣書
其情

病者方其呻吟時平生諸慾沙汰只有平復之願存
于中故不暇它及耳又有一種病人錢米細事於

醫藥中能管領且榮利等事錄渠淹病坐失期會
則虛熱上攻或失性命者有之豈不大哀乎彼原
不病而且無慾不以死生為計者是所謂至人也
余病已五六日舌苦而無厚味頭暈終日不暢
夜則轉身無笑如無所指向者故余平生省書之
心已減太半矣猶不忍也一日一番看然如過雲
之歷于眼也乙酉十二月二十四日漫筆

余夜夢千軍鼓噪炮聲撩亂炬火赫々而四匝忽欠
伸而覺則枕邊燈膏枯盡火焰兀々明且暗又爆
々有聲噫此一小光景入我夢中鋪張大陣酣戰

不已造化之權極幻弄也夫夢想也因也此夢類
因而非正因也然燈或置數步地則無此矣以其
直近頭邊故神与遊之也

一年之事細笑則大蕉肥鹿劇奇變於夏雲一人之
事暗記則荒槐纖螳太幻弄於秋濤而况百年之
事圓而無缺萬人之事齊而無差其可得乎余甲
申除日有詩曰吉語任俗為笑顏逢人祝小子何
所願慈母肺病釋肺病者咳嗽也于今悲思而靜
聽則吾母之咳嗽隱々尚在于耳也恍惚而四瞻
則咳嗽之吾母影亦不可覿矣於是淚湧而面可

浴也問諸燈奈燈不語何又曰大妹炊白餅小妹
製菑裳稚弟拜阿兄阿兄拜阿孃今也大妹歸于
夫家正應思家而彈淚暗啼矣小妹衣裙淚漬而
斑斑余攜稚弟再拜哭于祠雖欲疾聲而喚阿孃
阿孃其漠然而無應矣又曰弱妻親庭去逢年暗
垂淚所嗟地中女生存即四歲今年子重駒生焉
駒也母者以抱駒也故於地中女思少減焉只齋
恨于不使阿姑抱男孫也故淚墜于駒也額髮也
又曰汝範孺人瘞除夕卒哭祭耐耐憶舊人無聊
值新歲今汝範已除婦服又醺於任氏矣又曰明

五詩作曆三百六十篇憐汝吟太苦雙眉皺一年
明五今年詩亦不圓一暮毀而冬執余手零毀行
淚飄然向錦水去耳又曰人或滿五十言言半百
歎儂當二十五恰是五十半今居然之間又得半
六十之蹊逕也又曰一生心跡懶每於除夕悲長
懷除夕心新年好人為只獨依舊磨驢跡新年果
為好人耶此則雖無恒而善變焉可也彼造物小
兒何獨以此享我耶夫乙酉有閏凡三百八十餘
日事也此只余詩中語其餘人情世態大小事變
存沒離合不可勝言矣人雖智如良平富如晉楚

縱欲不老且死不可得也乙酉除夜書

六七八九歲時除夕元日何其好也戴雲長巾頭結
唐髻衣艸綠小袍子帶則赤錦鞋則紅皮夜排柶
子畫瞻紙齋歲拜長老則撫頂嬌愛是時也俊氣
橫生行如颶風毛髮皆躍天下之好時節無過於
此日也今見此輩踴躍則意思層動而顧身七尺
而高冠若箕鬚鬚鬚髮矣反猜之曰爾輩亦不久
願生玄髯安用爾妍嬋之衣哉兒必不信

近日漸覺新年之來則沒無好趣以其添歲故也每
年值十一月十二月則意思不快活不欲提起新

年二字日子漸迫則正如平生情契冷淡不欲見之客子先言某日將到吾家雖不大憎恨然意中八九分淡薄俄然之間元日當著則如厥客來到雖不可逐避情地則無一毫滋味矣

除日有無限戀惜意正如遠別情朋愛而難離當別期則細審其人之鬚眉精神歌音笑罵裝束步趨以其或此後不逢則樣子居然忘了故也又如童子將冠吉日既逼心中以為冠一加則童則別矣必頻頻手撫編髮人情之恒然也除日夕陽將落則情又不忍必細玩夕陽今年之日色只有此故

也須臾日落則其悵然難堪矣夜必加意靜觀星
斗曰今年之夜隔如薄紙耳忽五更鷄鳴則無可
奈何矣

既達著元日則如一墜鳥脚溪遍體黎黑成崑崙奴
不可洗沐耳不可不為今年人如來日丙戌年天
地萬物莫不自焚騰出丙戌年光色耳又如既納
采之處女已為宅家之新婦雖欲更得如女之名
無如之何君王之威不可為也父母之愛不可謀
也又如厓海舟溺衆民不欲為元人然正朔既班
區宇既一則雖沒無况趣其為元人不可逃耳

元日大冬寒威尚在人氣不能舒每年可恨也必加
人一齡漸鑄老皺皮可悲也相逢吉談多帶癆氣
清者不欲聽也齋米和尚聲頑而太可憎矣丈夫
或歸以新衣試影頗矜持一塵粘著口呵之手彈
之惋惜不已此輩陳人耳若不盈眄也家家雙扉
画尉遲沒無睥然神彩可歎也士大夫家屠牛人
人持紅肉往來如織飢鶯跼跼下攫此最不雅也
夫元日在局外縱觀之雖曰年新月新日新風習
苦無新趣味耳但父母康寧兄弟和悅斑衣双舞
明燈暖杯獻壽筵前此天下之至喜也此輩人可

獨當元日為樂耳至如殊鄉久旅之客感新悲昔
之人悲莫悲於元日且如余者哀情回薄難釋而
思親嶺海只牢騷忉怛崑崙山可移措於東南兒
時之樂何時而返耶

冬威尚餘添人一齡吉談多腐僧聲可憎丈夫衣新
門画無神牛肉縱橫此七恨之外差有一事甚快
活使童子檢奩問一年之中梳餘古髮一人之落
各幾一斗焚照鬚髻令人生煩惱想積庭中縱火
焚之東馳西奔焰氣勃勃須臾寂為寒灰煩惱之
想恬如古湫耳

鼠竅之烟夕則翦鬱室中木偶可目爛泥塑可咳嗽
况有血氣者乎余其闢小牖西向坐順烟勢而瞬
有理息有機目不爛喉不嗽矣十指皆凍綏願見願
如古蟾草画納袖夜歲衾不觸不爬時其屈伸而
幹旋於無事之地想忘之城但除害馬者而已今
鮮軟生新肥耳雙眼有風熱鎖筆硯囚書帙誓不
見潑明之窗闔眼深深安靜扶心久而眸酸半開
眼靛見純黑之物久則明漸養而風熱退也肝属
木陽也眼属肝而善回轉流注則動物也况邪風
搔木客熱熏肝眼安得不病闔者至靜可以鎮動

黑者水屬而亦靜象也老子曰五色令人目盲余
改之曰四色令人目盲黑色令人目明也夫赤目
賊也

号雲我又曰松塲館主人字虞裳者曰李彦璵譯學
而通日本入言語也庚申生癸未入日本翌年迺
還性悟妙有能詩聲丙戌元日尹曾若獲其詩軸
一日記紙三使人示我詩是遊日東者而雜體四
十首余竒之與曾若小帖曰菰蒲中徃徃有竒士
伏而不出吾輩平生苦癖搜羅古初之竒書不知
訪現在之騷雅而為師友真睫在眼前而不見者

也虞裳之什淹博而不濫幽奇而不癖超悟而不
空裁制而不短且筆氣蒼勁日記三紙破碎中逸
壻橫生正是人外物吾但恐悟解深而病不離身
九疇之一曰或不饒耶恨不讀其全集也其稿名
歐血艸或曰游戲稿

竊未曉

李虞裳軸自跋曰痔臥壹歧島舟中風聲雨聲水聲
蛙吠聲舉集灯下人間世牢騷鬱陶至矣間聞老
奴竊語說園囿中事情不得不動而喉不得不癢
之矣吐而筆之斷爛無序其言萬里行李之所經
者什一而平生志業之所存什九一切無摸擬心

矜收心平濤鼓柁以取適於道路耳甲申六月二
十八日誠鸛毛筆書于昌原客館斜陽明窗蟬聲
蒲樹其壹陽舟中詩曰兩脚侵香穗踈面午夢初
病多仍奉佛名斷尚貪書茶熟生真蒂虫游化小
魚苟能謀五畝夫釣婦看蔬又曰自吾能作佛心
悟不師初墨抹臨摹帖爐燔剽竊書貪嗔皆害馬
恩怨已忘魚道在貪堪樂終年食但蔬其海覽篇
祭海神皆瑰奇謠特多不能錄余每嘆東國局於
門閥懷寶而窮餓者多獨崔簡易少受用文章師
然承文提舉豈沽妻子而足榮簡易哉屢以大事

入 明朝只借銜或工曹禮曹判書或吏曹叅判
徒謫上國人耳東人那肯呼之以崔判書乎何異
夜天子也如虞裳者持被直玉堂焚紅蠟艸白麻
有何不可哉余愚下百無一能而但人之有才若
已有之此是百瑕中一瑜耳不識虞裳之眉目何
如而余熟言之慣論之且寫其詩文于雜記中或
謂之好事吾當不少沮也

人既一墮于地無論富貴貧賤不如意事十常八九
一動一止掣者蝟興眈睨之身前後左右無非肘
也善運肘者雖十掣萬掣不置肘於心亦不為肘

所僕役時屈時申各極其宜則不惟不傷肘亦不損吾和氣可自然遊順境中耳彼祝髮入山者苦不耐其掣之多也然刺血鈔經行脚乞米反苦不勝渾身之肘觸處皆掣也是躁擾為祟耳如胡孫為群蝎所螫不知或避或除善計処蝎之方只煩惱搔屑左爬右嚼不須更耐了蝎螫愈肆斃而後已

壞繇縮縫虱必聚狹荒墻古竈鼠必營宅狐之妖媚必於幽林之陰森也梟之叫嘯必於黑夜之昏暗也窟室遼絕盜賊之藪焉叢祠昏翳鬼魅之窩焉

此皆白日昭朗無幽不燭則不惟不掩其迹不能
以措其陰昏之計夫小人眊眊張目語顧瞬死
零碎之事其巧譎如詛出恒平之語其隱暗如謎
若夫營財肥己之事戕物陷人之言其陰狡尚何
言哉悲矣悲矣吾之一片神明舍乾淨通亮地也
何彼乃把作險譎淫凶之萃淵藪凡諸儼夫之攸
為小則虱鼠之咀齧其次狐梟之為不祥大則盜
賊之殘害鬼魅之魘迷無不溢現於晷睫之間吻
牙之旁人之生生之氣黯然消鑠久矣君子則不
然出言也祥吉如事也明白表裡通透無一纖翳

如盎春之恬風沐霜之昭月又如青天白日通衢
大道八窗玲瓏重門洞開是之謂清明在躬志氣
如神和順積中英華發外其蘊畜而發施不過淵
嘿雷聲尸居龍見而已是以人可以陽明為瑞慶
陰暗為翫厄也

丙戌正月初六日金雅士希文晦默來訪希文甲子
生故李進士龜祥門人也為人甚醇雅余曰天下
之可讀者惟經書耳不必一時多讀百十遍惟有
暇則讀雖十遍二十遍亦可而只以蓋棺後方訖
讀為心其餘子史諸家何必多讀然僕稍知讀書

之為可好而羸弱不克去可懼可懼希文曰兄言
甚善僕亦以經書為主而其它作家之文不過涉
獵而止若欲利益文章則多不過五十遍為可如
莊子讀逍遙遊則其它可推而知也或有讀莊子
十遍者豈非浪費心力耶余曰平日腦中有魂磊
氣時時作無故之悲而嚔啼之極誦離騷九辨尤
感觸層疊平心讀論語其氣必按下如此者數始
知聖人氣象千載之下能点化客氣如此也僕得
效頗深宗人有年少而慷慨者與僕夜語語次到
陸秀夫負宋帝入海事宗人淚忽湧于眼僕亦惻

愴良久誠誦曾點浴乎沂風于舞雩章畢二人者
始言笑自若也希文曰兄言何其與余心甚合也
僕亦有此氣每當蟲吟月白之時感激者深去年
上北漢山中讀論語靈後登東城門壘嶂峨峨靈
色眇眼意甚蕭然忽忽不樂急歸讀論語始帖然
恬靜矣兄言果爾也昔呂伯恭多氣凌厲病中讀
論語始變化氣質自古爾爾也余曰顧今亦多豪
傑有志之士而為科舉之學所誤委吾身體於詞
章決吾性命於科舉既辛苦得一科後不但不要
緡閱經書又盡拋棄從前之詞章因與不識丁字

同豈不痛恨乎生今之世不可不為舉子業而修
人事待天命此六字甚好不熱中可也兄亦能如
此否希文曰僕之初心亦於科舉淡然稍知科舉
外有一好事可為故也及至父兄勸之朋友譏之
不得已做舉子文始初時意內快快不快活且晝
則汨沒於排鋪結構其初心庶幾枯止夜必懊惱
不可言正如白身之人初為人奴僕服役勞苦其
心恒有係著不可造次間斷置心於科字上今則
久而恬然科慾漸長至落榜則慾沮亦有朋友皆
屈而吾獨得之則可喜之心豈不哀乎僕之本心

豈其然哉今世不知幾豪傑為科舉所誤銷泐其
良心也若以大眼目觀之天子之大臣極蔑如也
今以一小紙題名頒示於一隅數十里其所得幾
何此至細碎也雖然奈何哉余曰兄言露出真情
甚善甚善大抵吾輩朝鮮國人也語音衣服風俗
法制一從我國若欲超脫遠俗非妄人則狂夫也
然其意思度量則中原不可舍也何必躬到中原
然後可也今經籍莫非中原人所為若善讀則吾
之意思度量始不局縛耳希文曰僕對兄畢露真
情豈欺心而亦有何諱辭顧吾資品中下之間也

自幼頗有志焉今吾輩年紀不可謂不少而侍父
母安過了可謂無事人然其中居然經歷二十許
歲顧其業則無一少成不覺恐懼此後年漸壯而
事愈夥憂患疾苦固知其叢萃也豈不為與艸木
同腐哉若冥頑無知則已既稍有知覺而不能充
之是以惴惴也若有嚴師賢友與共周旋庶幾有
益而苦無師友自就孤陋耳然自以為有好善之
心聞有善人則未嘗不有願一交之心耳李雅士
亨祥兄知之乎嘗聞立脚甚固真所謂以明道希
文自期待者也僕嘗欲一見願交訪其家而不逢

耳余曰有好善之心者顧今有幾人兄有此心則
不害為賢士也李雅士亨祥人物固卓如也僕愛
之重之焉僕之同宗而且與僕同辛酉生故情義
尤厚也字正夫自幼資品清明醇真既早孤且無
師友好讀書穎悟而識見漸長今大拓藩籬博而
就約為工夫氣象亦好不僕役於拘縛而言語動
止無不井井入規矩吉祥雍穆之氣洋溢於言動
之間僕雖不才期其為大儒也文章亦洒然可誦
然知者知耳世人豈盡知正夫之深淺也哉夫此
輩人人必嘲笑僕不暇嘲笑而畏心先生耳能掃

除輕薄擺脫煩躁危坐讀經求古聖賢心非大過
人豈如是牢乎今聚千人於此擇如此人則果有
之乎無之乎多乎寡乎自量吾身則頽墮不能收
拾終是汨汨俗臼人只自愧悵之不暇那敢嘲笑
自樹立之奇士乎希文曰僕既喪尊師後心地忽
孤寂若無所依着始紬繹南華經及佛書既久之
漸到寂滅一轉眼則萬物皆無耳父兄親戚甚憂
勸勉道誘使之更讀經書以就真寀今除拔幾盡
脫危而安不為狼狽人極是多幸余曰僕亦以經
書為一生依歸地然亦徃徃有此病或極虛靜極

煩惱極憤怒極悲哀時虛無之想空蕩蕩擴出來
眼目頓爾殊絕宇宙間萬品無非幻妄耳然此想
之變滅亦斯頃間耳且此想之現發亦無常見則
除拔幾盡是到八九分好境若僕不及兄遠矣兄
之尊師有道孤而遺文之散落者或收聚否希文
曰先師無一塊肉寡妻貪欲死此天理之未知也
也吾師立志堅確自期於孔子地位平生文字信
口寫出不暇刻畫亦自裂棄不收僕惜之收拾於
斷爛之餘歲置若干紙也

三月青谿時雨新晴日色怡熙桃花紅浪激灩齊崖

五色小鯽魚不能猛鼓其鬣游泳荇藻間或倒立
或橫翻或吻出于浪細呬呬呬真機之至猜收怡
然暖沙潔淨鵲鵲鵲鵲二二四四或睡錦石或
啜芳芷或刷翎或浴沙或照影自愛天態穆穆無
非唐天震日之氣像笑中之刀斲心之萬箭胸中
之三斗棘掃除之快不留一纖翳常以吾意思為
三月桃花浪則魚鳥之活潑自然助吾順適之心
耳

火焦之桐沒無風采棄之可也屍沁之玉太不吉祥
避之可也然眼如玄珠者一睨之而秘藏則其不

焦不沁者反減色落色以其奇在于焦與沁也馬
遷之腐楊雄之吃左慈之醜衛玠之瘦鑿齒之髀
盧仝之禿方干之缺唇貢父之陷鼻彭几之迂米
芾之顛張籍之省仲車之聾羊祐之折臂古弼之
尖頭李密之黑晏嬰之短伯牛之癩疾長卿之消
渴杜預之癭殷仲堪之眇虎頭之痴雲林之潔此
數者人所厭惡者也然當世之人愛之後世之人
慕之彼膠清刷鬢粧嚴綾繡曼膚平膚妖冶嬌影
而無知無識者磨滅誰能記耶

讀禮書則一動一靜自覺妄悖生恐懼心讀醫書則

一飢一飽自覺傾危生懊惱心讀律書則一措一
施自覺干犯生悔恨心讀字書則一画一點自覺
違舛生慨惜心于時虛活大地之歎自不能已也
夫冷籍康戎之群應自以為脫釋於此數者号曰
外物然幸以淡泊為心故自與塵垢俗子迫別耳
若以此習橫拖突走於利欲場中將何所不至乎
持心不平愛憎歸於一偏者惑之甚也三日斷五疋
大人故嫌遲憎之偏也丈人屋上烏人好烏亦好
愛之偏也又有甚於此者竒邪攻心痼疾難醫不
亦哀乎瘡痂至臭而啗而贊之曰如鯁魚弓弦至

直而視而恨之曰如曲尺集孤白而為棗數海棠
之無香憎中取善愛中知惡天下之至公存焉耳
靈樞曰心高則滿於肺中愧而善忘難開以言若如
此言則聖賢所謂生而知之學而知之困而知之
及人皆可為克舜者皆虛語耶靈樞之言只論血
肉之心包較諸聖賢之論則糟粕滌耳然肺為
華蓋則蒙覆心包無寬通疎朗之意亦恐教不能
入昏惰庸鈍隨教隨忘當奈何乎與此輩語慎勿
說靈樞之論惟維持聖賢教人之語誘掖之庶幾
望其一條路陌之為愈耳是知聖人之言忠厚而

靈樞直論心之位置不論學若使之聞此語自知其無可奈何而尤暴棄也

一鼠入鷄窠中四足仰抱鷄郊而卧一鼠啣其尾曳之墜于窠外則仍又啣其尾曳之輸于穴窠有油或蜜蹲于瓶以尾探入于中塗之以出回身舐其尾一黃鼠渾身塗濁泥不辨首尾縮前二足人立于田畔如朽杙狀一黃鼠瞑目屏氣僵臥于其下有鵲來窺以為死一啄之故蠢動則鵲疑躍而坐于朽杙朽杙開口噉其足鵲始知坐于黃鼠之首也渾身蚤咀迺啣一木先沉尾于溪蚤避水萃于

腰脊隨沉隨避淅淅沒頂蚤盡集于木然後捨木
於水騰身於岸孰教之乎本無言語相曉假使一
鼠抱卵臥其一安知啣其尾乎一黃鼠作穴立其
一安知僵其身乎是豈非自然乎雖然人有挾小
術以肆狡黠者其鼠黃鼠之類乎

鵠雌與雌相交而卵鷄雄與雄相交而卵鵝無雄而
卵馬牡牛牝而交生肖馬之子棗榦葡萄蔓而接結
類棗之窠紅人莧化為蚯蚓鷄化為蝦蟆鷄化為
蛇是天地之乖氣皆不正不祥者也

曝油紙于烈陽火生水滴于石灰火生搗火藥而沙

入則火生人多飲燒酒火生于鼻煮膏于鼎火生
其中夜擊海波則火焰閃閃墓中之火燒棺松樹
簇立相磨戛則火生寧海府地火燃亦有積油萬
斛而火生夢八人而火熊現而火畢方來而火回
祿出而火冠岳有火峯景福宮火熊化天使來而
平壤火若火齋引火陽燧生火人之恒見者耳人
有新生孩鄭北窗知其為火精使之急投于江江
水熱沸亦異事耳

范氏之族乳必四垂晁氏之族指必二節是受氣之
或過或不足耶明宗室慶成王有百子皆隆準高

帝子孫盡隆準者非虛語耶西洋國人雖有老少
之異然軀輪顏貌箇箇相肖皆碧眼鷹嘴長臂
是國中山川向背或均適耶世傳金海金氏莖必
有黑痣或首露王亦然而後孫肖之耶大抵浮海
上來不知其父母且頭如銅盆年壽過人事多異
徵其黑痣遠傳後裔理或然也

孰謂松檜有勁氣不栖蟬耶余嘗見夏月松檜萬章
如如蟬鳴孰謂琥珀不受腐芥乎以琥珀磨於腕
肉上乍有熱氣垂於芥上則芥必躍接試以腐芥
則不擇也不但芥或毛羽或絲或紙凡輕纖之物

盡受之磁石亦有指北者而指正午者絕稀每近
丙丁方耳

人喉獵犬逐鹿鹿必疾走犬隨其後庶幾嚙焉而人
呼犬與殮休息鹿必竦犬至顧望而立犬復逐之
而又如前休鹿又如前竦凡數度鹿力盡而蹶犬
迺嚙其勢而斃之其仁耶信耶熊與虎相鬪也虎
張爪牙挾之以威其用力也專熊必人立仰拉長
松力擊之一擊而棄不用復拉松勞則多而力疲
也終為虎所殺其義耶貞耶人橫木于壑設繩套
于木貂群魚貫而度木先行者以首試納于套中

若甘心焉後至者爭先納首須臾間累累雄經無
一遺焉其順耶恭耶人惟有一偏之見而不能委
曲通暢者只戕身於無所名之事是鹿也熊也駘
也而衣冠者也

菜花生如來牛骨生觀音鸚鵡有歲舍利者蟒蛇有
号薩薩者佛氏之教何其普也動息之類若有佛
心皆可成佛耶吾道無之矣只聞性皆善人皆可
為堯舜而已花如來骨觀音鸚鵡舍利蛇薩薩者皆
反常也以妖斥之矣

鼠穴于佛經堆積中嚙而字敗又遺溺矢污之生數

雛或眇目或蹇足無一完軀蓋報應也若以吾道
處之逐之可也捕之可也佛氏獨非大人乎何恨
於鼠而隱暗之中使殘其雛也耶狹隘慘殘自無
倫始也

埋青龍於蓮根下則開青花雜松伐斷其中根只餘
四方鬚根拳石當其斷處而種之則作偃蓋松雀
雛以蜜和飯飼之成白色以白馬蹄為假羣者馬
病垂死以小鉄植扣其蹄血斑斑死則脫其蹄為
器用紋理如玳瑁是豈天理之正者耶

人氣屑羣鼠氣裂象鷄見牛則憊而不能飛梟越脊

舍則墜艾同茨荅拙則軟如綿象聞犬聲則吼叫
不復去桑柴燒蛇則足見鼠食礬石則死此物之
相制者也

死猫引隣家并蘇鉄枯而釘鉄則生側栢之枝火燒
而種薄松斷牛角利於鉅琥珀解以苧絲濯錦於
魚腥水洗銀以鹽則光燦然蟾酥軟玉楊枝倒挿
成垂楊剗楮而種則成林雌銀杏無雄銀杏則不
果醋能使象牙軟

仲子生而手有文曰魯夫人陶佩割指洒血於壁成
公字木葉出書宣帝名佛者貯漆金壺洒而成字

華亭縣天王寺雷震屋柱上倒書高洞楊雅一十
六人火令章凡十一字宋杭州折柿木中有上天
大國四字我國能淵石壁有字如篆籀蒼色劉之
而尤分明三日浦有丹書皆家有之而難究者也
雉折足而傅松脂則接蜘蛛為蜂所螫而嚼芋莖傳
其汁而愈鼠中砒礪毒則急入園中啖穢而甦俞
扁非教雉也蛛與鼠非讀雷公歧伯之書也且其
不病之時不知其何者為藥及其病也斯須之間
以某物為藥之心自然出直取其藥物如磁石之
引針嬰兒之吸乳渠亦不知其然也是天為之也

不使之自然而知則誰醫之乎天之仁心也欲難
家中醫書驗萬卷而不惟人人不能自治其病雖
有業醫者不能活人或心歧而不如雉蜘蛛鼠之
自然而且專一乎

蝙蝠六分鼠也鵲鷦四分猫也受全陰之氣故夜視
晝伏好昏濕也艸頭結柿窠木末發蓮花是植物
之變體也珊瑚樹木而如石者也陰精石水而成
石者也浮萍無根緣水而開葉兔絲無根依樹而
結蔓

余幼時見樓柱有穴可容穀升有蜂大如棗黃赤色

成群屯聚乘其采花盡出探穴則積細枯艸亂絲
裂紙諸軟暖之物其中有一黑塊如繭者相聯接
蠹蠹成蓮房每一房必有一蟻嘈以蠟堅封之余
仍如前歲置後幾日又發則蟻嘈始具頭眼趄足
白如羊脂痴而不動仍又歲置後多日又發每房
蜜皆盈焉以赤蠟封之蓋蜂皆成形以出而始釀
花為蜜於其中作事有次第且堅緻可愛也

屋樑木理裂圻众蝙蝠次第布翅而伏試以木尖築
之聲如戛鉄其下堆積枯蜂皆無首始識蝙蝠食
蜂頭也屑夜明砂則閃閃者皆蜂頭眼之破碎也

然畫不能視則安得捉蜂也且蜂窠非渠可入也雖畫蜂或可獵耶未可知也嘗捕其大者澆之以醋渾身酣紅以銅絲鎖其足囚于竹筒朝視迺逃去矣

白永叔乙酉冬往牙山鑿十里渠將以明春澆田穿二丈則有蟄蟾而無可從入之穴亦有蘆根直入地三丈皆是異事又地中盤大石有穴續長竹三四捍之終不得量其深幾丈云

宋治平丁未歲漳州地震裂有狗自中走出視其底皆林木枝葉蔚然我國平壤無井古有監司某發

丁穿一尺地中有大盤院鑿幾尺方透其下有水
菰齒蓄游魚潑刺仍掩之不復穿井諺傳平壤舟
形故忌穿鑿其後仍有壬辰之難此皆不可究詰
闕之可也

鳥之飛也必先南而後宅之氣之行也必先北而後
宅之各從其陰陽之氣也葵花之傾日品鍾之偏
也余種于盆觀其每日朝東午正夕西無一差方
其東也移盆使西之少間低垂而死噫余使葵失
節而葵守節而死也

余嘗聞舞鶴法當淨掃平滑之房不留器什只置圓

轉之木一箇囚鶴於房中熱火于堦使房熱烘鶴
不耐其足熱立於圓木必流轉乍立乍躡兩翅翕
張無常俯仰不已其時窗外吹竹彈絲喧闐嘲弄
若與鶴之顛倒相節奏者鶴心煩于熱耳鬧于聲
有時而悅忘其勞既久之遁放後多日又吹竹彈
絲鶴忽欣然鼓翼矯頸應節翩翻矣奇謀妙計一
至于此自是萬物皆不全其自然爾莊子謂馬牛
天也絡首穿鼻人也此欲通而反塞也絡之穿之
亦天也若不絡不穿不可以導馬牛之性也看它
首尾已有一天生可絡可穿之形勢此天也其所

謂人者舞鶴之類歟

余嘗聞枕中鷄法九月十月霜降時所伏鷄雖長形體至小明年霜降時又使之伏其外形復臧小至又明年孫鷄則大如拳雄者能鳴附板作枕養於其中每夜睡臥則丑時必鳴矣凡霜時鷄号曰霜鷄

余嘗聞土坎養鷄法冬掘土深若干尺架木為室只
有通明一竅積毳艸於其中駢群鷄入之使不出
常料飲啄之具外飯和土硫黃如菽大飼之明春
肥大倍勝味尤嫩軟此理或然也如葱菁之屬埋

於盆中冬置暖房時時澆水使不見陽氣其莖葉
黃白茁長潤肥也

余嘗聞大西瓜法掘坎數尺以木縱橫坎口又鋪敗
茵篩細軟肥土積其上一尺許種好西瓜子坎旁
通一小穴每澆糞水及其結棗清水糞水蜜水遞
灌則大如桶味甚甘矣又有大匏法種三匏於一
處俟其蔓稍長去根數寸居中匏蔓刀刮左右皮
子兩旁匏蔓只刮向內皮子三條刮如相合以葛
皮裹之黃泥封之久而聯成一膚只留中蔓而兩
蔓割棄則三根共成一蔓結棗可以浮海赤白二

色金鳳花亦用此法每一花半赤半白矣

鷄之大小倍於鼠也鼠直啖鷄肉穿入腹中而鷄不知避亦不小動兩目湛然若甘心者蛇之大百倍於蜈蚣也蜈蚣逐蛇蛇不能走氣沮如病張口而伏蜈蚣入其口須臾蛇死肥肉皆壞爛而始出鼠又穿鵝鴨鵝鴨不知避猪猫鵝皆嗜蛇鷄治吞蟾子如飲水矣蜘蛛溺沾蜈蚣蜈蚣化為水蝸牛涎繞蜈蚣蜈蚣足盡落蝸牛亦伏蝸

繞似洗

羚羊掛角於樹枝懸而眠衆掛首於木之叉処而眠此異類而同其眠也蝮蛇冬則刺頸於棘懸而死

明年春迺甦燕僊死堆積於木穴中或土穴中
宋吞溟謂我曰誠觀佛書若如渠言則佛之學固大
矣佛聖色界号为三界導師四生慈父三界者無
色界色界慾界也四生者胎生卵生濕生化生也
既曰導師慈父則六合之內物無洪纖化化生生
皆所管領也若然則吾道亦佛管領中一事而克
舜可學而為聖人佛不可成也欲學而成佛者皆
妄也以其至高且大故也亦若有輪回禍福之事
則高麗崇佛之時甚尊貴出家者而貴介子弟樂
為僧此皆前身善人故今生受此善報也今世之

僧必至賤至鄙者而人皆厭棄之此即前身惡人
故今生受此惡報也

智永寫千文八百本洪景廬手鈔資治通鑑三過胡
澹菴見楊龜山龜山舉肘示之曰吾此時不離案
三十年然後於道有進張無垢謫橫浦每日昧爽
輒抱書立窗下而讀十四年石上雙趺之跡隱然
我國高杜谷應陟少時手結一屋四面皆壁只有
二穴一通飲食一與外人酬答讀中庸大學於其
中三年迺出趙重峰憲一生無睡夜讀而晝耕田
田畔架木支書叱牛來往必涉獵夜又熬火母烹

映薪覽閤古人修業如是猛進大過於人如吾輩
者只飲啖昏睡而已

酉陽雜俎云無咎人食土其人死其心不朽埋之百
年化為人錄民勝不朽埋之百二十年化為人細
民肝不朽埋之八年化為人樂郊松語云大漢迄
西俗能種羊凡屠羊用其皮肉惟留骨以和冬禾
日埋着地中至春陽季月上未日為吹笳呪語有
子羊從土中出凡埋骨一具可得子羊數隻波斯
國種羊脰骨吳立夫詩云四園築垣聞杵聲羊子
還從脰骨生青艸叢抽膾未斷馬蹄踏鐵繞垣行

游成之曰一氣埏埴孰測端倪人生須臾即以耳目之常者拘議造物亦已陋云斯言得之矣

孔明自比管樂子美自許稷契孔明之才雖稷契猶可為也自比管樂者退然自謙是有其寀也子美之才雖管樂不可為也自許稷契者詡然自誇是無其寀也夫子美者雖得時不過諫議大夫材也韓愈唐之董仲舒歐陽脩宋之韓愈李夢陽明之歐陽脩皆不獨以文章比也氣節相似而獻言不背朱子之學不害為儒者也

莊子休邵堯夫俱豪傑巨人也然莊君憤而時激者

也邵公樂而自得者也又曰莊雖激亦有自得者
逍遙遊三字萬古至樂

天之生物無非欲生之心也彼蜘蛛腹便便貌瞿然
虫之不捷者耳不使之方便則不可以食故與之
絲食於網余惑於人之游食者耳四肢七竅不猶
愈於蛛之絲乎

其生而墮地也大覺其死而入地也大忘覺以後有
限忘以後無窮生死中間是郵舍也一氣之留宿
而過去也夫彼壁燈兀兀明也曉來燼落焉則
焰收而膏氣亦斯須寂然也其兀兀明者窮乎寂

然者有限乎

暴雨震雷偃卧談笑者不可以弘量與之也非冥頑
不知則必勉強假飾也蔡京仰視太陽而不瞬豈
君子乎大舜之不迷者豈不謂之敬畏哉其敬畏
故不迷亂失儀耳迷則怖悸矣怖悸豈與畏同稱
乎彼偃卧談笑者豈衣服冠而必寢者乎

凡人之暴棄不自敬身者自幼時日出而起妄言妄
事閑居而獨坐妄思紛拏寐則終夜妄夢至老死
不過以妄之一字了當平生嗚呼悲矣

青莊館全書卷之四十八

己巳秋典姓署
書員申景桓書



青莊館全書卷之四十九

耳目口心書二



青莊館全書卷之四十九



青莊館全書卷之四十九

完山

李德懋

懋官

著

男光葵

奉杲

編輯

德水

李晚秀

蕙隣

校訂

耳目口心書二

妄想走作時仰看無雲之天色百慮一掃以其正氣
故也且精神好時一花一艸一石一水一禽一魚
靜觀則胸中烟勃雲翳若有欣然自得者復理會
自得處則却茫然矣

細看萬物腐臭以外無非生氣英英不可禁遏而丹

丹低垂者匪久隣腐臭者也

事從順境來好非阿諛軟弱之謂也阿諛軟弱豈順境哉是却逆境也

才而輕者機巧生則詐而淺痴而鈍者機巧生則謫而露故不逃乎君子之眼也其或詐而深謫而秘是無所不為也噫古今無機巧者果幾歟

腎者藏精汁之臟也其所謂不亦重乎耳厚且堅大者必壽始知腎屬耳腎寒則耳好耳好則壽自然之應

肺六葉應六律乎并兩耳為八葉應八音乎葉中有

二十四孔應二十四候乎大抵笙簧之象也又曰
金五行之中聲鏗鏗者也肺屬金故為聲臟

春禽其鳴也和悅秋蛩其鳴也淒悲是氣使之也唐
虞之文渾灝叔季之文浮靡其於氣何哉

古之人能役其才也後之人只為才所役役其才者
用於所當用亦可止而止耳役於才則飛揚滋蔓
無所不為愚哉

人之病根不浮則必滯歷觀之免乎此二者蓋無多
矣浮者動之流弊也滯者靜之流弊也欲自修及
教人者於二者必斟酌焉

志大而無委曲者濶才粗而不精密者濫

便宜者迷大節因循者失大業姑息者遭大憂好勝者值大敵其勢然也

君子處事不可不敏不可不靜不可不精不可不確人必以好深者成亦以所好深者敗

無事時至樂存焉但人自不知耳後必有忽爾而覺焉此憂患時也如前官恬靜別無施惠於民及其後官稍猛鷙民始思前官不已也

青天中一片純白之雲分明是李烟菴知心

靜觀兄抱負其弟者中心忽藹然帶笑聽鼎大讀書

聲移時

讀醫書知人之得氣成形皮骨肉髓筋髮脉臟之從何處來迺始為人則人皆可為孝子

易惑於風鑑星數之說而喜懼無常者當患難榮利而得其正吾未知信也

馬首舉者火之象牛首曳者土之象也

天地間無無虫之物鐵之剛也火之熱也皆有虫鹿有蜂蛇有蚊不足異也

今人之不及古人者只以今人自處不以古人自處故也若修置好事但如古人而已必有後人贊我

曰某古人有某好事可學也其所謂好事不過吾
今日所修置者也

昭盱之睛翕張之舌吁其可怕慈祥之儀樂易之詞
噫其可愛

我非乘千里馬者然靜想夜乘千里馬者仰看星斗
應如練帶長

有頃然丈夫提余耳詔之曰棄汝饗曰敢不從命棄
汝嗔曰敢不從命棄汝猜曰敢不從命棄汝矜曰
敢不從命棄汝躁曰敢不從命棄汝懶曰敢不從
命棄汝名心曰敢不從命棄汝嗜書心瞠然熟視

曰書不嗜當業為欲聾瞽我耶大夫笑撫背曰聊
試汝耳

余十八九歲時有語曰心無妄意想可久而花發口
無妄言語可久而香生白良叔搗筆沉吟曰佛佛
余悵久之

使鈍童子開聽使狹婦人回心事雖小難於決頑民
之訟整亂軍之紀也

觀萬物可別具眼孔驢度橋但看耳之如何鵲步庭
但看之如何蟬之鳴也但看脅之如何鯽之飲也
但看腮之如何此皆精神發露而至妙之取寄也

也

市有半銖半鮮之魚可直二十文者也買者摘最敗之鱗瞪立蹙蹙顧笑而唾曰已腐矣可與犬賣者揚眉淺笑摘最不败之鱗曰細今日貴謂腐佯怒整頓其腮髭徐藏之買者曰雖然直幾錢賣者曰腐魚安有直曰試言之曰四十文曰十文當販否則否爭半畫傍人勸之平其價二十文二者咄咄曰我與錢多我受錢少既歸始詫眷屬喜魚錢之各相當也何勞勞乎用孫臏虞詡法初既各心可知直二十文相子受順無碍今二者爭半畫果誰

得乎誰失乎

陰德如耳鳴可自知不可使人知我不能而欲能者也論人過失如含血噴人先污其口我為而欲不為者也

文章到人所難言然而會余心愛之如天球吾姪心溪子曰邃洞幽蛛虛自裊吾友騎萍子曰黃牛聽雨角崢嶸蛛裊時想其脚幽虛可推也牛聽時想其角崢嶸可知也洞與雨影子骨子之間也

願天使我腦中無宿物使人口中無橫議

與其心飛揚而且大溺于物無所定也寧細弄砵戲

之稍竊心而順暢忘其煩躁也

蚶蟲雖細一齧倒一畔何嘗有假歸何嘗有碍
只任真機而已耳

我若有伏臘之供而不使老親飢安事乎舉子業也
哉宣行道我乎澤民我乎只啖飯迂士耳雖然使
我不勞役而淪其天真雖迂可不讀十三經二十
二伐史乎

袁石公豈非異人乎其詩曰好夢因涼得閑愁到水
忘無心而得耶有心而忘耶無論其有無只自然
耳讀書詩曰拭却韋編塵衣冠對古人著來皆肺

脩道破益精神把斧樵珠玉恢綱網鳳麟擬將半
尺帚匝地掃荆榛真道得讀書法

乙酉冬十一月以炯翁寒移居于庭下小茅屋屋甚
陋壁冰熨頰坑煤酸眸下嶮岬奠器則水必覆日
射而上漏老靈沁敗茅墮齡漿垂垂一滴客袍客
大駭起余謝懶不能修屋與稚弟相守凡三月猶
不輟吟唔聲塵三大靈每一靈鄰有短叟必荷簍
晨扣門咄咄自語可憐弱秀才能不凍先開逗次
尋戶外屨埋者打拂之快掃除團作三堆而去余
已被中誦古書已三四篇矣今天氣頗釋遂抱書

帙西移于炯齋有戀戀不忍離意起身三周旋迺
出掃炯齋積埃整頓筆硯檢閱圖書試安坐又有
久客還家之意其筆硯圖書如子姪之出拜面目
雖稍生而憐愛撫抱自不能禁也吁其人情乎丙
戌上元書

真情之藪如古鐵活躍池春筍怒出土假情之飾如
墨塗平滑石油泛清徹水七情之中哀尤直茲難
欺者也哀之甚至於哭則其至誠不可遏是故真
哭骨中透假哭毛上浮萬事之真假可類推也

哀之來也四顧漠漠只欲鑽地入無一寸可活之念

幸余有雙眼孔頗識字手一編慰心省火焉腦中
之摧陷者乍底定若余目雖能視五色而當書如
黑夜將何以用心乎

煩惱時闔眼坐睛膜之間作一着色世界丹綠玄素
煜爍流蕩不可以名一轉而為勃勃之雲又一轉
而為瑟瑟之波又一轉而為纈錦又一轉而為碎
花有時而珠閃有時而粟播變沒須臾局局生新
足可銷一場繁憂

馮時可滇行日記曰滇南雖雲滿山頭而寒不侵膚
冬日不短云按沈佺期詩曰四氣分寒少三光置

曰偏信然

李太白留別宗十六環詩曰我非東床人令妹喬有
著始知太白妻宗氏也

理學先輩亦有能畫者寒暄退溪農岩三先生皆能
畫而寒暄諸法俱好者也畫傳曰司馬涑水朱子
皆名畫穉說曰陳白沙畫梅花

智異山中有湫湫上松樹森列其影恒積于湫有異
文甚斑斕若絮藻名爲絮藻魚蓋松影所化也得
之甚難烹食則能無病長年云

國初有三公相傳屢帶河濱傳於辛碩祖碩祖至列

書而卒帶遂不傳此与呂處事同

清平山寺有高麗清平居士李資謙頭骨盛於石函
庚午年大霖雨山水暴至仍失石函又有石碑金
富儀撰七十年俞江原監司某命吏摺之時冬月
墨凍熾炭烘碑碑皆破碎惜哉俗吏不曉事

脰腠臍海狗也我國寧海平海等處有之而皆牡也
每年作隊運海而行南至于南海縣迎其牝尊尾
而去生牝則留其地生牡則移居于東海

文仲子王通十五為人師定宇先生陳櫟十五鄉人
師之李蓋齋十五人皆師之

自如驛人新買兒馬不食藟豆試授五穀亦不食至
於人所食者試之皆不食以燒酒與之始喜飲又
劉黃大口每之善吃其後連喂二物日行七八百
里丁丑歲酒禁後不食死

昔有十二歲童子宿山家詩曰夜宿幽人宅彌溝俗
客心門前流水在簷角碧峯臨晚節依寒菊閑情
托素琴松風如有意新續和孫吟

昔有林蕩戶者名得忠性豪邁登崇祀門吟曰画閣
岩窈出半空登臨悅若鸞飛鴻平生壯志憑無地
獨卧乾坤萬里風

昔有金興甲者閭閻人也能詩頗閒淡其隣老携琴
詩曰飯後鳴鍾意自閑橋頭深閉小柴關孤砧每
急黃昏際十室長寒古木間鳴度斷鴻猶北郭照
來纖月更西山隣翁不是清狂者日夕那能佩酒
還餞罷過山寺詩曰到來叅佛坐寂寞道心生虛
壁恒雲氣空門只澗聲風霜孤塔立朝暮一鍾鳴
天際頻回首殷勤念客行

道學可因文章可草性一也理也才萬也氣也

天下事都不成於一權字經權之權志昏者用之不
知誤陷權勢之權氣越者用之自歸失着

拙者不濫不澁則潔潔則直噫拙人誰也

石壁上三松層生也老壯幼可辨下松上松之孫中松上松下松之子與父靜玩久之儼有倫氣

笑有三品喜而笑慨然而笑雅諧而笑人皆可以有此也夫侮而笑媚而笑可一筆句當

外孫連為文職高處官制有藝文應教秩雖卑必擇其有文章重望宅日可主文盟者為之其選至清且重國初仍之權陽村近經應教後典文衡子止翕隄又經其職隄傳之李文烈李甸李甸即陽村外孫傳之崔文靖恒即陽村之外孫婿傳之徐文

忠居正居正亦陽村外孫也蔡襄靖壽即陽村之
弟梅軒公外曾孫於陽村再從外曾孫也亦得其
職

男妹一時大拜尹左相子雲卽申領相叔舟之妻兄
也一時大拜申占句云青眼故人俱白髮尹對曰
黑頭賢相只丹心申妾名只丹心故也

一門生三異人鄭北窗礪古玉礪兄弟旣深修鍊之
術其堂兄桂軒礪少闡大科歷敷華貫謝病杜門
研精金丹之秘世傳天仙降于其室贈詩曰桂香
芳馥郁仙馭自天來因号曰桂軒

宗室年七十九始封爵湖川君某 世宗曾孫漢南

君琬之孫漢南母惠嬪楊氏嘗奉養 端宗端宗

為上王嬪亦生廢 賜死琬謫咸陽生興安君众

生众生生湖川既絕屬籍編民伍年七十九嘉靖

甲午伏 闕上書始 命復錄璿譜封湖川副守

明宗初乃命追封其祖為漢南君父為興安君湖

川又以子珣追封君云

師弟子一時為國子長貳退溪先生為大司成時李

龜岩楨為司成退溪弟子也

成均司業 仁祖克大亂首訪遺逸張弢軒顯光以

持平召之辭以老特拜成均司業國初無此職特
為旅軒設也

甲子官爵與古人同洪忍齋甲子生再典文衡以禮
判兼帶二相戊辰入相李月沙生年文章位次每
之暗合然忍齋壽八十而月沙七十三云

三孫同中進士高靈府院君申叔舟孫子三人同中
進士漢城試第一第二第三徐四佳以詩賀曰三
顆明珠叔仲昆一時榜上策奇勲旁人若問渠家
世上黨高陽內外孫

三婚叅龍頭會贊成蔡壽婚三人金勘金安老李耜

也蔡設龍頭會安老好皆參之勘欲與之以非魁
非之勘令其夫人告之曰小婿三十五為大提學
乞以此入參也蔡笑曰是不可不許參也召而與
宴

獻壽恩門大夫人辛酉三榜狀元李石亨舉三榜獻
壽于恩門權止翁隄時大夫人李氏年踰七裏康
強無恙有子贊成擎承旨摯中樞攀護軍摩司僕
擎皆一時勲臣功名煥赫

右相兼吏判 宣祖辛卯柳西厓以右議政 上命
兼吏判西厓以前無此事辭之 上不許

大諫直拜都承旨 仁廟乙丑鄭桐溪蘊以大司諫
遷都承旨政院故事承旨由同副以次例陞而今
由諫院直拜本職出於 特恩

議政兼大提學 世祖朝申叔舟以領議政兼兩館
大提學禮曹判書魚世謙李荇金安老以議政兼
帶大提學 宣祖朝柳成龍以左議政兼大提學
吏曹判書

價接盛選顧崔兩 詔使出來李月沙廷龜為遠接
使朴南郭東說李東岳安訥洪鶴谷瑞鳳為從事
官車五山天輅權石洲韓金南憲玄成為製迷官

韓石峯護以寫字亦在行李芝峯睥光差都司宣
慰使後改迎慰使蓋極一時之選也

三女即行僇死人李允章妻李梧里側室女也夫死
誓死不食哭日一啜瀝米裋麻不去身五年而死
其妹李時行妻丁丑避亂江都江都敗虜驅子女
而歸立號曰吾完平李相國之女也遂自刎淑夫
人李氏梧里長女也初聞其妹被擄死不哭問故
然後哭曰善乎死也不沒其名也

鄭門忠孝鄭百亨字德後虜亂以前掌令入江都虜
陷城衣朝衣望行在所四拜而自經命強忠

匡門父孝成 昭敬時以清士著名有善行強門
祖元麟亦以至行表孝子閭高祖誠謹好直諫廢
主殺之曾祖舟臣痛父非命不食減性 恭僖時
皆旌其閭五代祖陟 世宗朝錄清白

孝烈忠節四世八人永膺先生李至男性至孝父掌
令彥忱乙巳謫舒川沒先生以喪歸葬親負土石
朝 上冢悲號莎艸為枯母安夫人有節行患痢
幾危殆先生嘗糞沐浴祈天憂勞吐血以沒孺人
鄭氏乙巳名匡鄭源之女也其家旣滅門而死繼
母權氏無所歸孺人請於姑奉養於家三十餘年

先生之喪日啜菽米寒不易衣三年哭一如初
顯宗十二年命先生及孺人旌表長男基稷性至
孝先生沒哭極哀頭髮盡白未練以死次基高
昭敬朝以行誼 召用光海時累徵不起次女未
笄先生沒啜粥哭三年而死基高男惇吾江都之
敗守節死之其妻金氏亦臨亂自決次子惇叙在
江都遇賊義不辱赴海死

一門三代四烈女丁丑江都之亂李月沙廷簡夫人
權氏白洲明漢妻朴氏玄洲昭漢妻李氏明漢
子青湖一相妻李氏皆死節一相妻李汾沙璽末

之女也聖求妻權氏亦死之是又母女同節也

前妻後妻皆烈女韓五相字世翊年三十七歿初娶李相國聖求女丁丑江都敗守節死之後娶鄭府使基崇女五相死鄭氏自刎殊而未絕子均又死終不食而死

三世持哀而歿洪趾俞仁祐不勝喪而歿子迪亦未終制而歿迪孫有阜又哀毀逾制既三年才逾月而歿

永順君再登科 世祖朝設登俊試 命列卿大官宗室駙馬皆赴試親臨策問大臣鄭獐趾鄭昌孫

申叔舟為對讀官廣平大君子永順君溥以正一品入試居第五 賜恩榮宴于議政府壯元金守溫以下各 賜鞍馬 幸溫陽設重試永順君又擢重試第一 上大喜特命加一日遊街 賜米五十石唱翁三名天童二百乃異數也永順歷事四朝再策勲聰明宏達雖富貴少無驕矜之色掌撰誠鑑及六典至 成廟朝卒年二十七

宗室駙馬及弟永順君溥登登俊試春陽君綵繇式年及弟駙馬河城尉鄭顯祖叅 親試第三名

宗室文武職 世祖朝進禮君衡有文武才以慶尚

兵使入為吏曹叅判

宗室入相

世祖為首陽大君時

端宗祭酉拜領

議政龜城君浚

英陵孫也討李施愛再為功臣

世祖戊子特拜領議政時年二十八十八為兵曹

判書二十一為都元帥

至尊為恩門

世祖設登俊試得十三人

名諸人

于內殿曰古有座主門生之号今是科予親策之

予當為恩門室号是殿曰恩殿越數日

兩殿坐

思政殿諸人獻爵一如門生座主之例東方所無

之盛事也

三塲壯元李東谷先生為生員及會試殿試壯元李東
州敏求亦為進士及會試殿試壯元

宗室登武科 世祖朝銀川君号洗心亭有慷慨之
志精敏之才常擢武科屢將禁旅再受 命分巡
諸道

兄弟同受方面李坡選 授平安道觀察使明年弟
封又按黃海道觀察使一時兄弟同受方面重寄
人皆榮之

為議政父母俱存鄭領相太和六為首相廼黃閣十
餘年父母俱存無恙

父及夫與子皆上相宋領相軼女洪領相彥弼妻而
子暹又為領相盧蘇齋守慎挽之曰一德從三上
台貴百年除六老星尊且其壽九十四歲也三從
又皆為平安監司父時以處女隨往種桃于園夫
時為夫人隨往其桃花杲爛熳後又為大夫人隨
其子往桃已老衰矣遂攀援嚔啼有金城泣柳之
嘆

成均薦舉 文宗辛卯十一月 上語左右曰今有
布列朝著者皆綺紈子弟不學無術國學生必有
通經史識治體者其令本館薦舉遂薦進士安良

生 上優秩用之

入閣主文早年龜城君浚二十八入相尹士昕三十
九入相李恒福四十三入相李德馨三十八入相
三十一主文金壽恒四十四入相三十四主文金
勳三十五主文李荇四十主文南智十七為慶尚
都事亦異事也

賜宅只三人 世宗朝黃喜 賜宅 宣祖朝李元

翼 賜宅 肅宗朝許穆 賜宅

親臨耆老宴 太宗親臨耆老宴取題名案親書

御諱上壽六十則載 上諱從 上教也又賜土

田奴婢漁塲以厚養耆老門外公卿以下皆下馬
洪氏三世壽洪裕孫南陽吏也佔畢第子号蘇叢子
史禍善類皆死獨潔身以壽終其子至性博於百
家教授十人亦以壽考聞又其子贊天亦八十自
莊憲時至 純孝之世二百七十餘年只三世

七世壽考 太宗王子益寧君移八十餘子秀泉君
貞恩八十七子青杞君彪八十三子威川君億載
八十四子文忠公元翼八十八子完善君義傳八
十子倉守守約七十九七世二百七十餘年

李氏慶壽宴 宣祖三十五年政院 啓前叅議李

慈母今年九十九當有老老之典明年正月 賜

饒廩加爵具子右尹推恩三世又拜京畿觀察使
置酒上壽卿大夫有大人承養者晉興君錦溪
君尹判書韓叅判洪中樞南叅判李中樞晉昌君
駱興君尹叅知權少正姜翊衛李中節為十三人
明年大合設慶壽宴 上令諸道供給又 賜法

樂百歲夫人以上壽最尊姜相國貞敬夫人以命
婦最貴皆中堂南面其下八大夫人各以命數為
叙東西相向諸夫人各從後列序禮畢晉興以下
諸公皆再拜子孫衣冠而侍列者十九人折衝將

軍文荃國子典籍弘立獻納讓最顯其在執事之
列者又十六人各舉觴上壽百歲夫人蔡壽之從
女生於弘治甲子沒於萬曆丙午歷三萬六千甲
子為一百二歲觀察公七十沒有二姊皆九十孫
樞府公又八十餘諸執事子孫八相者一人繡衣
陞朝者七人為臺省者一人出宰百里者六人
二女為 王妃睿宗章順王后成宗恭惠王后俱上
黨府院君韓明滄女也又有二女一為 王后一
為 王子夫人西原府院君韓確女 昭惠王后
也又一女桂陽君璿夫人也又有二婿皆大君者

平陽君朴仲善婚月山大君母反齊安大君璿也
外孫七 王子洪逸童女 成宗朝淑儀也生完系
君燧鳳安君性甄城君惇益陽君懷景明君忱雲
川君愼楊原君愼又金元女 世宗朝愼嬪也生
桂陽君璿義昌君玗密城君璿翼峴君璿寧海君
璿潭陽君璿此六 王子也

兄弟尚主 太祖朝慶慎宮主駙馬上黨尉李夢弟
清平尉伯剛 太宗祖貞順翁主駙馬也 肅宗
朝顯肅公主駙馬豐川尉任光載弟豐原尉崇載
成宗朝衛淑翁主駙馬也 太宗朝淑寧翁主駙

馬坡城尉尹愚從弟坡平尉尹嚴淑慶翁主駙馬
也 成宗朝慶順翁主駙馬宣城尉南致元從弟
宜川尉燮元徽貞翁主駙馬也 宣祖朝貞善翁
主駙馬東 尉權大任再從弟東昌尉大恒貞和
翁主駙馬也亦有祖孫尚王者 世宗朝貞顯翁
主駙馬鈴川尉尹師路孫鈴平尉燮 成宗朝貞
淑翁主駙馬也 成宗朝惠淑翁主駙馬高原尉
申沆孫靈川尉儀 中宗朝敬顯公主駙馬也亦
有叔姪尚王者 定宗朝德川郡主駙馬府使邊
尚服從子柔川尉孝順 太宗朝昭善翁主駙馬

也

三世壯元及弟金十齡金萬鈞金慶元兄弟壯元柳
自漢柳自瀛閔鼎重閔著重柳命天柳命賢吳璣
吳瓚

六兄弟登科元海宏子植 仁祖壬午科楫 仁祖

乙酉科楫 孝宗甲午科格 孝宗辛卯科梈

顯宗丁酉科楸 顯宗癸卯科

善山名賢善山自高麗時名賢輩出金澗吉再金叔
滿金宗直李孟專河緯地鄭鵬朴英

名賢一時居魁退溪南冥同居慶尚道一時俱叅左

右道初試各為壯元盛事也兩先生生并一世同居一道而一生末由相逢退溪之沒南冥痛悼甚也

至尊郊送都元帥國朝都元帥自魚有沼尹弼商及壬辰以後數人皆無設壇推轂之禮 仁祖即祔之年四月 親送都元帥張晚于西郊 上御戎衣彤弓赤矢乘馬以出至陣都元帥率將士具橐韞迎於路左 上御幄殿大司馬宣軍令召元帥入以軍禮見禮訖就座張軍樂進禮饌 上解所御劔以賜數百年來所未有也

南夷北胡馬羈射 世祖辛巳對馬島主宗成職還

平茂續密告邊警 上嘉之授食知中樞院事一

日後苑 觀射茂續與野人浪將家老為攜鞍藝

上謂三軍都鎮撫禮曹判書洪允成曰爾職長春

官且典兵務邊境之事悉主之今南北一家皆授

誠哉宗惟卿等左右之力是賴其後茂續親謁判

書松茅輶行奴隸之禮 上特許便宜相接

養生家子時後披衣坐而東或南盤足坐叩齒三十

六通握固閉息內視五臟肺白肝青脾黃心赤腎

黑次想心為光明洞徹入下丹田佛家有白骨觀

初想其形從一點精氣始漸漸胞胎孕育生產稚
乳長大壯窠衰老病死以至屍骸胖脹枯僵久之
化為白骨既想為白骨則視其身常如白骨所以
厭棄脫離而無留戀之患也夫二家比諸吾儒涵
養省察之工夫皆是妄想然亦十倍勝於一種浮
躁之徒閑居獨坐衆慾紛拏無所抵定也大抵二
氏工夫篤實可愛

文章以善形容為好杜甫曰鵝兒黃似酒東坡曰酒
如人面天然白趙孟堅梅譜詩曰陽鬢正七萼則
三點眼名椒梢鼠尾傳肱蟹譜云蟹鵲眼蟹足珥

鵬翮腹其介類拳丁其螫類執鉞俞蓋期曰積御
木大者三圍高者九丈葉聚樹端房栖葉下華秀
房中子結房外其擢櫨似忝其綴窠似櫛其皮似
桐而厚其節似竹而輓其中空其外勁其屈如覆
虹其伸如縱繩步其林則寥朗庇其廡則蕭條李
廡画品曰有二龍自山下出龍蜿蜒驤首雲間水
隨雲氣布上雨自爪鬣中出魚蝦隨之或半空而
墮一龍尾尚在穴前踞大石而躡舉首望雲中意
欲俱往怒爪如腥艸木盡靡波濤震駭茶經以魚
目湧泉連珠為煮水之節推此以觀文章之善形

容也

事有幸不幸不惟李廣雍齒之封侯與不封侯也淵明之五子皆豚犬耳然至今其名不朽杜甫之奴段韓愈之奴星若為富貴無識之奴隸則人孰能知之乎以將帥而死於節義者終古不知其幾人也今中國人家家奉關雲長神刻像画像鑄像繡像塑像身佛教並埒至我國亦立祠豈非幸之甚者歟曾先之十九史畧中國賤之幾乎絕而不見幸而流於東國為小兒先入之書最有絕倒一事倭國關白世世有大司馬大將軍博陸侯之号蓋

取漢宣帝時霍光稽首歸政上謙讓不受請事皆
先關白光然後奏御意關白跋扈有廢立其王之
事餽此以名之乎於光幸耶不幸耶何不兼取霍
字為姓耶然則尤幸耶尤不幸耶

凡水穀之味入胃則津液各赴其道酸先入肝苦先
入心甘先入脾辛先入肺鹹先入腎余嘗未究食
辛而淚食酸而涎今始知肝屬木酸味滋而木氣
旺則脾土動而廉泉開涎迺湧也肝屬金辛味滋
而金氣旺則肝木動而液道開淚迺流也且雖不
食酸而或見酸談酸思酸則涎輒湧需何也未可

知也

古人曰愛而知其惡惡而知其善此天下之公心廣大而且委曲又曰隱惡而揚善此大統大人之言別無委曲也又曰見善如己出見惡如己病此分別二者真心惻怛而稍露圭角也於數者未嘗不眠膺而亦自主棄短取長利益吾身及見朱子長善救失之說自不覺三復贊嘆其忠厚正大之至也棄短取長非不好也此言一出自歸褊小益覺義理之無窮也但愛知惡惡知善及長善救失工夫純稟然後可為也如己出如己病加力則猶可

及也隱惡揚善棄短取長雖中人庶幾爲之也此
數說盖有難易精粗之別耳又有一種密緻而細
究其情則悖戾不可掩者莊子曰爲善無近名爲
惡無近刑若如此言擇其小惡無所不爲也棄其
大善不敢爲也依阿中間情狀盡露此中士恥不
爲也莊子休豈非豪傑巨人乎何言之恰似細人
也全身遠害之學流弊至此此其所謂異端也漢
昭烈不過閱歷兵塵老於弓馬之一武人然其戒
子曰勿以惡小而爲之勿以善小而不爲此言明
正莊子之明不能道也以其少師盧植稍聞儒者

之術故也異端吾道之別觸處現露如此夫

金真狂啓升筆法竒逸為人磊落其圖書印章刻新
羅憲康王第三子派八代平章之孫龍門山玩義
翁主人金啓升君曰甫自号真狂七十三歲翁字
弱冠選入於玉冊書寫十七又差都城門額終
不得預而戊辰通信使往日本以別書寫隨行顯
日本正殿之額日本山東居士評曰見其書不見
其面可乎右軍耶真狂耶身雖異方手則同焉異
哉貴所難言也七七腐人林本裕評曰中國筆脉自
元常止於雍紀春無復繼者今觀金李兩筆出於

海東未知海東山川果何如而孕出人才也然則此兩人之筆可謂當今之天下一筆也

連山士人姜氏無男只有二女長女五歲次女二歲慈母見背長女負抱其妹養之乙酉歲長女已十二歲次女七歲一日父往遊隣里其家失火二女鋪席於火不及起先入祠堂抱四世神主次第安措於席上又入而長女抱其母神主具有耐位神主一座次女抱之將出而火勢已急圍祠堂二女各以手堅抱神主伏以死之人滅火求之肥膚燒爛神主完全不污一點烟氣死猶堅抱邑中多士

請旌門 上許之命旌曰殉孝二女姜氏之門蓋

其家風遵禮二女習聞嘉訓云丙戌正月記

光州村婦有二子一七歲一五歲俱充軍籍里丁米
徵軍布村婦終夜對紡車引綿絲二兒皆眠村婦
油然而愛之手撫二兒莖獨自語曰汝有此而為男
子子故吾不辭勞而紡絲也二兒佯睡潛聽明日
共於屏起相對泣曰吾輩有莖故母憂而勞矣盍
去此以弛吾母憂也遂引刀兄割第莖弟割兄莖
埋之以綿裹創血流于袴母驚問兒語其故母持
大哭曰匪嫉汝有莖吾憐汝為男子而戲之也太

守聞之復其戶五六年
前外黨朴汝秀氏為余言
丙戌正月記

余於雜記中得二孝子皆丐兒也今合書之而有感
又思王延江革之孝余眼嘗有淚而末由也其門
有貴人月夜過橋上者聆其下有歌聲下觀之
則丐子也坐一老嫗塊上以丐得酒捧盃而跪
進焉唱歌以侑貴人訝詰之丐子驚嘻曰僕寡人
聊為阿母歡貴人嗟嘆良久歸明日轉相傳語稱
異後時時窺之見丐娛其母者多類是自是諸貴
人每宴輒置餘豆間曰以待孝丐兒也長洲相城

有一乞兒姓沈年在中歲每詣沈隱君孟洲所請
丐凡所得多不食而分貯之筒篚中隱君初不為
意久而問焉則曰將以遺老娘耳隱君始異之潛
令人偵其所為丐至一岸旁坐地出簞中飲食整
理之擊至船邊船雖陋而甚潔老嫗坐其中丐登
舟陳食母前傾酒跪而奉之伺母接杯乃起蹈舞
而唱山歌作嬉笑以樂母母殊意安之也必母食
盡乃更庖求若無得則自受餽終不先食之也日
日如之凡數年母死丐始不見隱君嘆詭亦時少
周之

屈原懷沙過甚之忠也於陵吐鵝過甚之潔也凡有
善行而失於過甚者乎人有所不敢為一二而聖人
亦不以盡善許之也直不疑買金償郎幸後見獲
而明其誣也若不見獲終晏然受盜之名乎即金
猶細事或誣以盜太庙祭器亦不辨而甘受戮乎
妻師德唾面待乾唾面者至穢之而視猶犬豕也
吾無過惡則拭之而不深怒可也彼若愈侮而刺
之以刃亦不拭血而自平常乎雖然師德之言可
戒浮躁狠愎者也梁剗凝之為人認取著履即予
之此人後得所失履送還不肯復取夫子之異於

人也然還之而不受何義歟非執拗則矯飾金國
王去非北隣有喪忌東出而北皆人居南則去非
家去非壞蠶室使南出此亦非中也使隣里有水
火盜賊憂病急迫之事惟待我然後可活則不惟
蠶室雖尤於蠶室隨吾力可為之也此不過一拘
忌非正理雖責而絕之可也何乃反遂其志乎
皇明楊翥隣有惡少侮之公不為意至慮以驢鳴
駭其幼子而轉售之惡少為之感化然吾驢無心
之鳴何與於隣家幼子也或家有惡犬逢人即囓
不但轉售殺之可也驢雖鳴未必然者乎我國黃

翼成公喜使李文康石亨書綱目題目婢持小饌
倚公座俯視文康謂公曰將進酒公徐曰姑安之
婢更倚立鴈聲曰何遲遲也公笑曰進之既進有
小童數輩皆藍縷跣足或挽公鬚踏公衣盡攫其
饌且毆公公曰痛痛皆奴婢之兒也此公天性寬
厚卒如此而賓主之禮上下之紀無乃不可乎尹
大提淮少時暮投逆旅不許止宿坐於庭下主人
兒持大真珠落於庭白鵝吞之主人索不得遂疑
公將告官公不卞只曰彼鵝亦係明日珠從鵝後
出主人慙曰昨何不言曰言之必剖出故忍辱故

待耳公旣曰彼鵝亦係主人何不度之而今乃輒
乎未可知也公亦何不明言我見鵝吞可與我待
其遺矢矣乎然則主人惜鵝當少待其遺何剖之
有若主人悍而剖之已剖於彼鵝亦係之言矣此
傳記之說或有誤耶古人題夷齊廟曰草木猶沾
周雨露愧君惟食首陽薇又有題洗耳圖詩曰水
中若有水水亦洗其水此責人無餘地恐傷忠厚
亦過甚之失也是故君子雖多之而亦少之也此
皆賢人之卓節猶有後議况中人以下乎蓋覺処
身之難也

過去世有五大樂而人或泛忽只以功名烜赫為樂也余表而出之其一老萊子斑衣兒啼悅其二親乎其二唐虞君臣都俞吁咈以致太平乎其三文王太姒琴瑟鐘鼓友之樂之乎其四夫子杏壇三千門人揖讓升降乎其五張公藝九世同居和睦無數乎此數者要不出人倫之外始知全人倫者至樂存焉聖人人倫之至也故擇五樂而聖人居三焉

誠鼎大曰汝今年已十歲矣當汲汲孜孜疏滌膏鈍克遵長者之訓不可只騰踏挑達也悠然而為十

五又憊然而為二十三十終為無識之人則誰人
欲與之語乎古人惜寸陰如惜金以壯大而無聞
為平生大憂早為之地也今汝溺於漫遊不顧惜
寸陰如棄帚下之微塵浪送一日如啖一餅吾甚
憂之也誠學童具氏子宮其曰汝今年已十五歲
矣大凡人子十五六歲時節長者田地已七八分
作基今汝行不安詳坐則搖身言笑無節讀書甚
廢且厭夫聰明至精英者也假使聰明有神見汝
若勤苦不已憐其志而來栖於汝膏中矣汝若輕
浮懈怠如醉夫如狂子雖暫栖於膏中當唾汝而

急飛去矣汝豐頰深目者間濶何事不可作也人或奇汝貌譽之曰為人如彼終不餓也汝自負此言而以讀書為第二件事耶雖使汝為陶朱石崇黃金棄籜籬間腹中無一文字人人對汝必增鄙吝之心汝其安於意乎陶朱石崇何嘗不讀書乎吾愛汝而戒汝汝其勉矣

漢周亞夫從理入口餓死南史水軍都督褚叢面甚尖危從理入口竟保衣食而終史記舜重瞳項羽亦重瞳而自剄死隋魚俱羅亦重瞳為煬帝所忌斬之我國南袁亦重瞳我族人昔有重瞳者無過

人之事而只不能噉飯朝夕啖餅充飢而已從理
入口一也或餓死或饒衣食重墮一也一聖帝二
俱不令終一陷害忠良為萬古奸人一只庸庸平
人相法果可信耶果不可信也

禮圖大輦有伏兔輦經以腎街為伏兔夫兔善隱伏
之獸也故取象而名之凡器什如此者多船具有
猫即碇也盖取猫利爪善攫物堅定之象也亦有
鴈取鴈尾之隨風而善周旋之象也

心溪子夏月卧清風溪老陂石上久之忽瞪眼曰吾
身半成石仍歎曰死作此山鬼足矣

意欲閒中見聞百花性情色態編花叢孤又輯古今
高士評論之号曰高士本艸

沈玄育水墨龍顏頤槎牙坐尋丈猶恐來拂觸其露
端明潤水欲滴

室中排列泥金画宮室人物之倭硯匣韓石峰額體
帖木刻青紫硃筆筒作竹節狀回回青書爐壽富
貴三字盆中雜種金鳳花雞冠花人雖曰雅士吾
必謂之俗輩耳

黃金鑄王摩詰彩絲繡米元章良辰美景招佳朋名
流排鋪詩軸画帖必先撥芳花泛潔泉酌之祝是

日助詩情画意呵禁敗興客不使來到門

嘗歎曰有田百畝書萬卷花艸數百本法書名画五
六百帖澄心堂紙十萬枚李廷珪潘谷墨各千笏
中山霜毫筆五六瓮端硯數十面名茶異香隨意
以供名流十許人與千戶侯等猶闌茸不為之高
士何不毀冠裂裳作棄民乎

適意事如可久享彩雲可使終年不散也琉璃可使
擊而不碎也楊州鶴可騎而騰也

心溪子曰兩腫子炯炯垂秋水虛映空忽天與靈逢
中之色空蕩蕩其趣也灝遠不可言亦無可以言

聞者炯菴起睨曰我有兩耳震玲瓏徹空獨不可
聞爾之言耶

太上安貧其次忘貧最下諱貧訴貧壓於貧僕役於
貧又最下仇讐於貧仍死於貧

出諸唇舌而琅琅刺刺者無形之文也發諸紙墨而
整整差差者有形之言也鬚眉牙頰欣然可接肝
肺通暢文不如言精神意想隱然可求氣脉委婉
言不如文言而無文一出口已無痕故貴有文
作文可別具麻姑爪快爬造化窟底來神光騰出紙

墨上三四丈

蹈襲古人文字曰人面瘡不知以何物代貝母用忌
抹其口

梅花龕中置柚子是辱梅花也曾謂梅花之清德潔
操忍能假借它家香以助己也

才子肚中有一派春泉湧出琤淙連淪不得停貯試
灌于右腕涓涓而流達于筆管點滴毫端圓了了
如汞珠如鸚鵡舍利如鯨人淚

座中展古畫奇書轟笑飛沫垢手掬之捫之刮之者
決非知画與書者也決非雅士也決非有識人也
集古人輓詩哀辭比次而觀甲死而乙吊之乙忽又

死而丙吊之以至于無窮集古人議論比次而觀
甲之言乙必非之乙之非甲者似無它議而丙又
非之亦無窮世界只以此二事如許如許銷遣了
否

至人之處毀譽也無論真與假皆不能不澹不
痛平人不能善處真譽真毀况無宗之譽無過之
毀乎無宗之譽何異乎夢中食加影上瓜肥無過
之毀何異乎夢中漿乏影上棒打病人惟幸食加
於夢懷人猶恨棒打其影

語中帶隱鋒是域弩射影法不如對面快噴去後痕

然無後議

騷人韻士佳辰媚景詩有聳山吟眸漾波牙頰生香
口吻開花少有隱機大是缺典

溪清石涼拾紅葉爨黃梁越添潤香

清高之隣奇清之第怪奇之僕僻怪之裔自僻以往
吾不知其為何物

九歌九章豔羨之極欲焚筆硯一月幾四五次

詩而泣鬼神筆而奪造化画而犯靈境隨倒清貧窮
鬼隨之耶太半不解世事歟鬼挾之耶

咄咄三昧事堯天何以降九水九經何以入秦爐諸

葛武侯何其早卒不復漢室

世間有三快綱目大書昭烈皇帝章武元年陟太尉
奮笏擊朱泚終童乘長風破萬里巨浪

曹娥碑如織秀婦人自能矜持時出嬌語褚遂良蘭
亭帖如詩酒才子一見雅士自爾畧畧收檢米元
章雅集圖序如再眠春蠶無不勃勃欲動

客曰肚裡飽不利讀書只思卧睡肚裡畧畧有飢氣
讀書頗覺有味呬唔之聲忽泛空中富貴好事也
讀書亦好事也始知兩好事兼享者天下有福人
莫謂至靜而失言屬垣之耳可怕莫謂至暗而放心

瞰室之眼可懼小心之極凡牆壁之孔竅通明如
耳如眼者驢耳之軒軒牛眼之炯炯凝視而寂聽
似有意則皆洞洞屬屬也

黃蜂背有漆書巫工二字

朝起鋤芥畦上堂把筆腕大戰如風中舟歟或疑好
奇故作顫筆病固可以故作乎匪病故顫神必呵
之六月朝炯菴書于圓覺塔東

小孩兒毛孔骨節俱減長者獨眼睛不增不減相小
兒眼睛大是壽眼

角物不界上齒画中龍蒲口槎牙都是齒合口龍舌

以難画

鉛丸洞甲而不能入灰大碗砲碎十丈城市帳禦之
剛強之果柔和以制之復何勞

天生之物體圓者多人獸之孔竅節肢艸木之枝株
花果與雲雷雨露是也月準日圓日準天圓水準
三圖乃生萬物萬物準四圖圓者居多水何圓水
銀雨鈴皆圓擲石於波波迴虎眼也人獸眼睛裡
聚水華以準日月故最圓

店僮曰西山大師遺矢皆化活鮮魚是佛子肚裡有
魚驅馬人曰佛若使人不食魚緣何佛身鍍金用

膘膠佛非不使人食鱗羽毛介設此禁為众生戒

大殺

馬唇類蠶唇胡桃仁如將化之蜂蝶子鼠尾類蛇虱
如琵琶蟻似麥黃綠斑莽史如黃綠斑蛙背夜明
翅類牛膝獐尾根如梅杏鬚蟋蟀聲如竹簫搖莖
燈穗如蠅眼冬牛髀如松子窠蛛肚類人拇樗葉
蒂類馬蹄白麥飯類狗蠅

退之送楊少尹序曰亦白丞相去歸其鄉又曰以為
其都少尹其鄉其都果是何鄉何都退之筆路昏
墨

甲曰人間好事拘牽一食字路頭輒礙乙曰鼻下有
穴即缺陷界丙曰蟬也無鼻下穴粘高樹清風灑
灑終畫盡意而鳴無少低垂曲縮樣子快哉炯炯
子聞之爽然而書于西簷

犬噬人以蚓蛆糞貼瘡而傳之犬尾蟠其中是毒之
鍾也創既完而犬毛生其上人必死

清寒云同異異同同異異同同異異同同或諸作
對炯菴奮筆画一字希溪云三四四三三四四
三三四四三三又請對又画一字呵呵曰清寒希
溪饒舌饒舌

魚膠栗茸皆夜有光
朽柳夜如燐烏圓之背
黑夜拂之火光燁燁茲
四者陰類也至陰通明

無心言有心聽傷於密
而不免為細人有心言
無心聽失於疎而不害
為好人無心言有心聽
殃雖未至鬼必謀之矣
有心言無心聽災或已
至天必憐之矣無心言
無心聽善於點化則若
有心也有心言有心聽
善於應接則猶無心也

閑熟人是喜生事人生
事之極憂患至矣孤寂
人是能損事人損事之
久歡樂永矣

藥欄干畔金鳳花為曉
雨褪紅小婢子攀花而
泣有

遠觀士夫開眼孔曰項霸王泣別虞兮時政如是
寧人負我無我負人坦蕩易直如騁良驥馳大途無
少回曲

蟲鳥之倫飛空虛者迅邁之極毛翅眼嘴泯然一色
不可細辨古今画家寫飛物不遺微纖舉體皆具
與啄飲栖睡者無異是雖名家未達此也

張茂先曰大腰無雄龜鼉類也細腰無雌蜂類也余
曰蛙大腰也而接蜻細腰也而媾

有人号曰矧翁貧而業製弓矢者也

不遇知己嘔唏忼慨徒勞耳名画工寫人五分面貌

婢販夫指而咄曰一眼瞻見屋角砌隅轉折欹斜
必從而歎曰好大家將傾倒天下事無不然何歎
之有

惟無欲迺無辱

只有剝人肥身之心人將何堪畢竟為人所剝

古有堪輿家誘一愚下子弟指某丘曰此猪嘴形也
指前小岩曰此糞形也葬於猪嘴富不可言愚下
子弟果葬其父母也嗟世人只希為富人又惑術
家不顧忝先之為羞

猫與犬不相關然犬遇猫無故而逐猫當捷登屋角

俯犬而坐犬可掀首相望憮然而退矣猫不此之
為而犬一蹴却立猫必弩脊鼓頰張其爪攫犬鼻
犬始真怒猫不免矣

甲跨牛乙跨馬宿徐館晚將發甲跨馬乙跨牛去駸
駸信無疑甲跨牛乙跨馬日既紅毛色異甲跨馬
乙跨牛

朝霞辰砂紅夕霞榴花紅

施人錢財者有勉強色大損陰德

張肖父序李于鱗集曰古樂府五言選不以為白頭
陌桑曹枚之優孟哉余曰夫如是于鱗之文質孫

叔教也後士有學于鱗之文是質優孟也質優孟
與真叔教相距遼曼哉

口角無完人其人便不是完人

好色者髓枯膚削至于死之夕而慾火上升終無悔
心成就只一色中餓鬼余嘗笑之憐之懼之戒之
勿顧自家有不幸而近之者余之好書太類好色
近以天行風熱右眼亦癢人頗恐動以書崇余稍
然之然書不忍一日離每開眼一線許湊集字墨
間精華用脉望食僊字法彼殉於色者應揶揄我
九月晦吾友我居士戲寫

僕詩文如二分廿八分酸山果其爲人也如三分熟
七分生野馬半生半熟半甘半酸時節尚遠何以
則果濃丹砂頰馬調碧玉蹄乎

有眼目善評論者之讀詩與文也鴻章鉅篇無論雖
瑕句類什頓增聲價暗察主人之著翻翻焉湧溢
喜氣無眼目短評論者之讀詩與文也瑕句類什
無論雖鴻章鉅篇越落聲價暗察主人之著盛盛
然隱約愁色聲價增而無喜氣聲價落而無愁色
是不奴僕於技與名者然得與知者論吾亦隱几
而笑也

錢東礪平生半漢半胡學問卡佛卡儒文章非詭非
謎畢竟狼失後脚狼失前脚

齊有無鹽縣楚有不義縣鵠為伯趙犬為李蜀漢有
杜詩明有韓文楊仕伍李八百神仙也白起黃歇
李耳栗腹孫權稱衡名之妙儼也地肺天目山也
不留當歸藥也

空中之雨脚不可把而玩也假使玩其圓徑乎其六
稜乎

北斗之匡四象地北斗之攔三象天四稜方也三折
圓也北斗司命而酌元氣故象天與地

鼻嘔之蛆可粘蠶蒙取其粘忘其穢

能淹博而不能纂著猶無家之花不已落乎能纂著而不能淹博猶無源之泉不已涸乎

漢文章異已者容之宋文章異已者斥之明文章異已者侮之又有罵之仇之者元美輩侮罵者也中即輩罵罵者也受之輩仇罵者也可以觀世道升降也

兩頭蛇九尾狐天下之至惡也然明者可以避勇者可以殺惟身飾衣冠口談文史之讒夫明者不可避以其讒者蜚語也蜚語何能捍勇者不可殺以

其荀數人類何能人人恣殺

生長農商家四顧無師友能竝悟文章快脫塵染是成佛之資地則文獻多師友又多書籍終年幽莽者將若之何嗚呼悲哉

不能深諳何可強談

不做成生之事便是攝生服藥導引終涉外物

文章喻以閨人鍾伯敬淑女也袁中郎才女也

可怕可怕薄有才而使氣可憫可憫專無家而騁辯天非高遠也萬物咸被天而遊以其空虛者盡天也猶魚被水而遊也

晝無事觀天白夜無事闔眼觀天白心坦然闔眼心
怡然

峻節霜凜雅度春溫

高人對俗人睡俗人對高人睡以其不相入也俗人
睡鄙無論高人睡何其陋也若有真高人必不睡
何也能容人也

文章一藝耳尚渾混於雅俗真贋之辨山水何能品
人物何能鑑持公心者識文章偏見之守不可以
口舌誅

贋文章猶可說也假道學不可說也

升平之世寶劍無用時以熟酒酌神左揮而睨曰亂
臣逆子安所逃乎右揮而睨曰譖夫士人安所逃
乎逼燈而觀青瑩之銚頓如秋水

白香山賦荷珠曰不寄寓於傾歌每因依於平正可
止則止必荷之中央在圓而圓得水之本性喻君
子守身也崔膺金鏡賦曰玉匣初開寒光飛出仰
映清空天地洞通萬象在中虛涵不窮湛為寒潭
搖為飛電任在公以無心有妍媸而自見喻君子
明心也

青莊館全書卷之四十九

己巳秋典牲署
書負申景桓書



青莊館全書卷之五十一

耳目口心書

三



青莊館全書卷之五十一



青莊館全書卷之五十一

完山 李德懋 懋官 著

男光葵 奉杲 編輯

德水 李晚秀 蕙隣 校訂

耳目口心書三

人之汲汲於財利者不過欲保全其性命也庸下之人
反以性命為輕不亦愚哉余家三浦時有人腰纏錢
十緡渡將解之水未至其半遂陷掛胃半身江畔人
急呼曰脫甬腰下錢則可活矣掉頭不聽但兩手拊
錢唯恐失之仍溺焉

惻隱之心油然而生聖人無間也然利欲撐中則
頑然不發亦可異之事也余嘗渡三田渡水有人載
穀於牛牛躡冉冉將淹其人持剗彷徨呼咩欲并沒
焉江畔有人遙謂曰吾將濟之爾與我錢否曰諾曰
可定幾錢而已牛遂沒焉

愛所不當愛而不得其正者是係騃也余外廡所寓一
少年性癖愛馴鵠造次言談無非鵠也殆不知衣服
飲食之切已有犬豕其一鵠少年逐奪之拊而流淚
甚悲仍剥毛炙而啖之猶惻愴然味甚旨也此仁歟
慾歟騃而已矣

善處權讀書者亦以為難也况下民乎有一民兄弟共
擔其父屍悲哀異常行至清州舍擔於大道其兄呼
泣來行人曰今吾二人抱終天之痛擔父屍行遠道
不食已幾日弟毀瘠欲垂盡將奈何遂買狗肉拔劍
截之又詢於眾曰弟又死其誰能致父屍願諸人勿
罪仍勸其弟食弟哭不能食兄哭曰吾其為汝先啖
遂食一齧弟始食之而起行人莫不酸鼻

愚者明知死可畏也然見貨而犯取死之道惟倖心也
倖心之至何事不為銀坑經霖而水積則不可汲故
厚貨給人弭開壠匠於是坑傍穿地道入知近坑則

地道旁又穿一穴可容身復力穿隔坑之土頻睥睨
旁穴水頭湍澆而出則始躍而入旁穴也水出勢悍
而不息數晝夜廼止匠只飢坐也地道口其妻子彷徨
焦心待流屍之出也幸不為水所衝乘水縮纒然
而出復得誇大其善穿地也嗚呼其不死固偉哉
不義者非知分也雖然不義之中有知分者而老死脯
下第一也有業商者鑿秤室其中納鉛丸可滑轉無
聲賣自己物則暗轉丸于秤頭使之重買人之物則
反是焉與輕價至老齧肉人不知也病將死召其子
戒曰吾所致貲者丸秤而低昂之也雖然未嘗大取

而適可以止利無筭而術不敗也汝其紹我慎勿墜也後子倍取人物坐贓死

橫米之財亦係數也不可以妄取綿布商死众商送葬有一商獨憇于樹忽漫畫地有銀箔于坑遂納袖袴驚喜過望不告而歸忽渾身發癢不可耐遂入興仁門道傍家手探懷則青蛙活跳擲地啖然而死隨探隨擲懷空而無一銀遂訝而歸蓋是時家寡婦從門隙見一男子探銀于懷棄地而去遂盡拾藏之翌日商悵然復往擲蛙處無有矣只有二小銀現焉尤悔而索之寡婦曰何狂也無銀矣商慙然而出二銀直

錢二百商法不送同商者英罰錢二百仍以是網馬
避山移吉雖不假卜巫貴機警也赴武舉者宿店舍倚
矢于壁有丐兒庭立睨視似默記矢數武人心疑之
迺削桎長短多寡如其矢倚于矢處莊真矢以待夜
半有賊攻店舍武人登屋脊放桎矢賊却立曰蜂蜂
者赦也矢之謎也武人連射之賊曰矢已盡可進攻
武人始放竹箭賊應弦而倒

臨危而慮長惟至敏可為也是故閑居無事宿講處變
可也京江打魚舡舡狹而櫓多可疾行故有時掠商
舡遠逃也有船多載貨賊登之其法收飯匙依其數

殺人商船火長童而慧先至艙底執一匙落于水因
泅而隱于鷁旁以刀仰插賊舟板底少頃賊殺人如
匙數大搶而逃火長遂訴于江華府請集京江諸打
魚船於是招諸般泊於浦火長解衣泅之探刀于船
船中賊皆坐法死

正朝使自北京歸時賈人沽母猿而來方娘也旣入我
境悲而躑躅賈人寔慰之中途生子人納于袖中行
時出使乳之一日猿亟請出子因戴首人立而行有
驚擢去猿悲不能耐人又慰曰爾雖悲其奈何猿若
寬心者焉至店舍忽捉鷄剥毛仍戴而周旋於鷄擢

處驚又下擢猿始執勇礫之俟賈人晝睡解其韜結
項而死噫是固謂歟而人者彼人而歟者何足貴哉
猿見繫於人又失子不死而奚爲

有人佩銀裝刀座有人欲之佩刀人以大肉塊與之而
戲曰汝能不嚼而直吞此則可與此刀其人欣然快
諾吞之橫在喉間兩眼浮突以手撫腦旁人駭之曰
汝其吐出當白與刀也其人口不能言但以手揮之
似有不聽其言之意俯仰食頃始下仍取刀曰非不
知吐出之爲好而初既相賭則安知吐後反有異言
耶嗚呼見利淪身滔滔是也見刀而不吞肉者似無

幾矣

軍資監霖雨新霽有大鱗入倉旁黃鼠穴吞其雛腹果
然出伏于庭湏臾黃鼠牝牡倉黃而來於鱗前迭穿
地甚長若窺焉于兩端又直鑿穴仍各自尾而豎其
喙終與穴口齊鱗遂逶迤入穿地自首至尾恰受無
罅少焉鱗兩端不敢動腹翻閃不定遂斃蓋二黃鼠
潛咋也出而破鱗腹有四雛死而體全出置淨地迭
含菽葉及鷄腸草來先布菽葉藉雛覆以鷄腸草頗
厚各於兩旁埋喙葉中吹氣四雛蠕蠕延生噫智哉
義哉慈哉人若具三焉可謂善人也己余蓋聞擒黃

鼠撻之众黃鼠四集力救其急難之義可感歎
不能領畧頭緒随人口吻喃喃昵昵者非麤粗則昏弱
也

惠迪吉從逆凶子平前已有如許好術數觀其眸子人
焉瘦哉圖南前已有如許好風鑑

泛善人遊日往日得從惡人遊日往日失人情得則喜
失則愁扁鵲寶箴捍禦盜賊之不暇也至盜賊在我
睫前而不知併吾身而失之悲哉

邪視流眄甚於莖暗笑隱謎甚於盜是以君子五官眼
孔舌尖為機緘也

終日靜坐口出正言我所敬畏也或有不能靜坐正言者已是落下第二等又從而笑之是落下第三等第一等者不好人乎第三等者好人乎

假有巧詐諂媚一生騙人雖慣於粉飾自謂便利然其障蔽於人者甚薄狹隨遮隨現極勞苦哉

揚人之善是無限好事其為之者不湮滅而獎勵聞之者效則焉我其言之則又是效則之也

甘處下流與疾言遽色其失威儀一也

宋之問古之諛人也其詩溫平果出於性情之正乎蔡京古之譎人也其筆勁端果從心而形画乎是或別

種子乎然詩也筆也技而已矣只觀其大體之如何則邪正可分也

筆記者通吾所欲言使它人如聽余言也語當精簡而字當楷詳可也

豈可與鹿豕為群乎木石與居乎市沽同遊乎如有通達吉祥文雅純淡凡有一善者皆我師友也幸得與之同隨所望至矣奚暇忌之乎侮之乎

寬人其罕乎或有所謂寬焉者皆失之濫散不能飾也是豈寬乎哉

使氣盛之童子任其遊戲慢罵將何所不至乎為父而

不能教子是甚於自己之犯

多讀書而少思量簡言語而沒趣味是虛名寄乎多字
簡字上

千罇萬釐之迭敷而迸出者只緣吾與千萬人其志洽
欲相同而不得焉彼千萬人又邁邁不欲與吾一人
洽相同焉夫一人之為也有同者有不同者可於不
同者中取其同焉者而已則機穽不可設也鋒鏑可
銷而戢也

措心和悅溫平無拂逆其順適是人生大福力

持心要寬平安靜寒暑有時乎不入古之人八火不焦

入水不濡云者指此也

天下之害不祥以無根之誇橫加於人也然其所誇畢
竟卽綻聞誇者若紛紛辨白亦系燥擾也且有輕重
尤審慎

易曰懲忿窒慾又曰慎言語節飲食夫四者人生之大
防也心學之大業也修身與攝生豈二致哉心火易
熾欲其降者懲忿也腎水易洩欲其升者窒慾也脾
土養氣者也氣不散而上越者自慎言語始也氣不
滯而下洩者自節飲食始也

律已須明白待人要包容

於稠人中摘發人之所忌諱大傷忠厚吾之欲懲焉者
也欲朋友之久要先除其疑阻之心於薄物細故也
凡聞人之才學假使忽漫之間內生猜疑外發嘲誚此
豈尋常事也大是殺機究其心頭已萌創子手段自
警自警

日用處身行事當有藹然二字可尋於施為之間非獨
慈愛恤惠曰藹然雖嚴猛決斷底事不可不有此意
思

我生而無志無師近陋寡聞之人也百無一能之中有
尤所不能者四焉曰不能博奕曰不能親小說曰不

能談女色曰不能吸烟然此四者雖終身不能無傷也使我教子弟當先以此四不能導之矣

我見祈寒盛暑終日危坐肩背竦直者假使其學不至已括宇宙已百倍於顙墮躁擾者故未嘗不欣然欲學之矣

凡人以伶俐為行世如由禮所謂將上堂聲必揚戶外有二僂言聞則入言不聞則不入戶閉亦開戶闔亦闔有後入者闔而勿遂等語此是真正好行世其欲伶俐者或不此之為而反顛倒猖披其所謂行世可知已

狂叫盛唱不足使人憎眼
龐讀雜誦不足使已利益
精神易耗歲月易邁天地間
最可惜惟此二者而已
為鄉愿易為狂狷難

有夢必曲為解釋欲其符驗之一一者係躁擾也余嘗
有夢不欲談之矣

大丈夫雖處窮閭寂水不緇然長使吾腹中惻然有好
施與救窮乏之意思

取旨味而啖河豚羹惑地師掘遷祖先墳墓使子弟專
溺於浮華程式之文而不親近經書者皆余所惑焉
而不解者也

子弟年少而好卧睡厭避長老之規警只欲優遊無節
使其質緩則歸於庸鄙而止無所害於人若其輕俊
長於口辯巧飾掩遮為務將何所不至乎是故貴蒙
養

人若責之以奴隸市井則怒待之以淑人哲士則喜人
情固也然顧其所自處則奴隸吾也市井吾也是故
君子貴自返而惡名實之不相副也

惡經學之士則欲埋沒其全體大本而薄青細過增衍
不已也惑卜術之人則欲掩遮其欺世誣民而一知
半解鋪張不已也此習尤所省察處也

不可為靡率之寬厚慘刻之詳明亦不可為遲滯之寬
厚忽畧之詳明

古者禮樂不可斯須去身至後世樂亡不可論也禮猶
有斲爛遺缺之不盡亡者顧人之不欲為何哉至曰
古今異宜風俗難變貧富不適誠然矣然古今固不
可以酌量乎風俗亦有時乎可從也貧富稱其有無
也元氣有病惟參附可治而不可得也一指忽不仁
炳艾葉則可已而又易得也退然而歎曰大者不治
小者不足為也豈人情哉

士君子處身行止一則小學二則小學朱文公羽翼經

傳不可尚已其編緝小學一書是大功業

不教子弟以小學責其輕率險詖是無星之秤

不干涉人婚姻閥閱扶抑其高下者亦士君子百行之
一也

委性命於文章搜羅古今雖似博大不可涯也若不知
此外有一種真實好事則其局小量窄不可勝言

吾身至小也呼吸瞬息屈伸動靜吾隨其所向甚易與
耳吾四體以外職職萬物有多寡強弱之不敵雖欲
其盡聽吾命不可得也不如反求吾身處置安排各
極其宜而無後害也

人心之陷溺不可以挽回則無可奈何耳丁謂以曹馬
為聖人夏竦以李林甫為相之羨者顏山農以慾字
為學問許筠以男女縱淫為天之所命金聖嘆以水
滸傳教其愛子為初學之門此固表出者故可大驚
熱心術不正之小人不陷於此數者定未知其幾人
也但多趨趨而不敢發口耳危哉悲哉

行實思連連躡上層居養思連連處下層如既為平人
則思突過為善人自善人思突過為君子大賢以至
于聖人此係健也如處廣廈而與梁肉當思曰使吾
處草屋而敢菜飯其不怨矣處草屋而敢菜飯當使

吾處上室而飢餓其不怨矣此係謙也夫如是安性而不妄恭哉

自周孔以後數千百年害道者日興九流百家不勝其紛紛又有技藝玩好諸瑣瑣搖惑人心者及其陷害一也自元明以降至于今日小說演義之風為害不小與科舉之學併行踈眉朗目好箇男子汨汨兩間六經之文幾為束閣未嘗不慟恨于此也能闢小說而雖從事舉業不將性命而委之者亦足為扶護聖經也我言雖迂其自警則切至也

言語煩率心無底定也慎簡二字為口業要訣

師友見在之經書經書過去之師友惟吾心地與生俱
生倚仗此二者可復其初然不親近此二者惟怠逸
之是求不為禽歎定稀矣意想到此不覺悚然

親近污下之人則凡吾出言行事無所忌憚故雖有時
明知其賤陋而荏苒漸入套中也以其承順吾無半
箇規警也非不知正直端莊者之為可近而自不能
肆意放過亦有對症之良訓只足為逆耳之資故自
然踈退而其箴訓者若或頻數則始厭惡不可耐操
戈反攻此平人以下所宜勉焉者也

凡出言當惻怛從心肺中出來不為從喉吻間圈套語

始不為譎險物耳

意思常置活潑潑寬綽綽地專務疏鑿吾室塞處

閉門靜坐窮究經史心煩乃止有時乎登山臨水逍遙而歸亦安養田地也

士君子閑居無事不讀書復何為不然小則昏睡博奕大則誚謗人物經營財色嗚呼吾何為哉讀書而已若有可為之路而不資生者棄民也然力與謀不相入顧無如何矣勉強其所不能為則其不犯辟者小是欲巧而拙也不如聽天安命而已

人之所不為我則能為之人之所能為我則不為之非

矯激也擇善而已人之所不為我亦不為之人之所
能為我亦能為之非詭隨也就是而已是故君子貴
識

余鄉人也愚蒙無知且躁擾不定然其淺見所欲為者
不以無根之誇不察之論橫加乎人也何以則庶幾
焉

終古真正英雄傑巨才學未嘗不從沉靜中辦出來凡
敏妙精捷者雖似浮動而其沉靜固在不言中矣若
遲滯為靜者安且貴哉只做事仍循不成耳

譽者近於過實毀者近於無情過實者非真是也無情

者非真非也故士君子習中國當有真是非也

余非學問人也出言行事固多躁妄然其性癖甚貴學問之人或是一線秉彝之天未泯歟繩之以儒門之法則知而不能為好而不能行懶弱頽墮其去小人雖少有間隔其一躓脚而為小人直瞥眼間耳余亦丁寧自知其過然譬諸肆口罵學尸目睨經顛倒猖狂者稍有可恕之路猶謂之衛聖恐或可也

夫所謂學問人者顧不可愛乎自度渠身昏墮只思惺卧晝睡而彼則勉強正坐惺惺持敬我則鹵莽滅裂讀經書如耳邊颼風彼能不放一字究竟乃已我好

論人長短發言麤粗從以鄙俚彼乃時然後言言則
不素以我準彼百事百不如安得不愛

惡聞加倍善名減半是由陽奇而陰偶君子昂以反
易其神變子秦燼不能燃

貸人錢時心與償人錢時心異吉祥之人不如是
詩雖小道樂亡之後詩為一身之樂乎

我既不可以傷人人亦不可以傷我
加人不根之謗者必有無故之災

居常攝生當節捐生曰孝

知禮者其知兵乎裁制補輯一也

不汚泥人筆硯亦作聖根基

吉人醉善心生愚人醉悍氣布

先看品後看材

經如聚訟經斯病矣文如賭博文斯賊矣

有斯事則具斯格

處人虛而受人則斯精矣固而自信則斯悖矣

知物之反理為災不知事之乖常為災也

見孩孺而憐憐其未壯也見耆老而憐憐其過壯也
人得天地正氣立則頭陽而豎天卧則背陰而帖地
身可從心不可從

一傳二傳其訛滋甚仍是以疑人其於暗何故貴怒也
父子兄弟夫婦相愆外人夫人雖恬聽鬼神其赦諸
人不勁無樹立文不勁陋矣書不勁廢矣
君子有大怒夫小怒蔑如也

讀書者怡神為上其次受用其次淹博

小兒啼笑天也豈人乎哉長者假喜怒斯愧小兒矣

酒有三曰導氣曰布情曰行禮昏情以往害人道

有為而不濟人雖無它大犯誦曰僇民

得半日寡欲猶萬古中堯舜時節

修藝任命料不熱中已具九分田地

思可副而言

讀書知保身

見雲思所以潔而無滯見魚知所以泳而有潛
村畝里閑時有以怡心

見滿天星宿頓令人高迥以色正也

讀書貪多量智也非涉獵之謂也病夫窒而固焉
騷人者見不長

假談圍繞真聰消泐

責庶民以不安貧亦不廣夫安者自安

文貴形容書貴雅

言語要而已

可貴者儒雅氣將帥婦人農商若有是氣可愛也萬物皆然

對校人不可不小心非畏彼即敬吾

載籍校讐至明而備明儒之功不下於漢儒專門

有心於博奕緣它氣蘊駁檢鍊不得

君子之學先除狹狹則疑人

滯之病暗快之病忽

處事貴通讀書貴活

故言非吉士

事無大小審首尾決行不行

家有拙子與濶子其不能振起家門一也然濶子其於辱親何

嗟夫嗟夫親戚之際有時由乎名利古狂所以離羣

姦淫貪濫其真死已久其骸雖不卽滅猶老物假燐而行

言之淋漓宣中也哉事之澁滯豈常也哉

對人言先點檢其小瑕待其去卽朝之者号曰狐蜮之倫

汰煩培真庶幾人矣

怨詆之漸現於不遇知我然知我固樂矣不知我亦何害

壬人不可罵不受效而先勞吾聲色

不可妄論人文章此至微細事也大禍未嘗不此中起物我相忘安有爭鬭

心要寧謐匪放肆之謂勿猜疑人勿辨人猜疑

好事到九分常虧一分地

不足怒處必大怒不足驚處必大驚嗚呼鄙夫也已

奈俗人不知何只任之而已

高皇逐胡元烈帝殉社稷三代以來其明乎漢不可及

已

使不肖子第求死不得大是父兄無識

家中置博奕之具是導子弟偷也

勿置人於無所容身之地

恥憤惕悔為人之基

腎兩顆對着形外遙迤以圓內曲凹故兩耳對着輪竅
象之肺下垂故鼻之地位懸垂也心之端少指南故
舌從其勢而縱僵且稍尖也脾胃互有磨勢而脾橫
已胃是唇之象也肝有稜象眼也

心一顆處南而上火也腎兩顆處北而下水也此陰陽

對位之明正也

肺心之在上血氣之相隨也肝腎之處下子母之相依也脾在中央土之正位也

腑者陽也胃為腑宗故承咽而居前也臟者陰也肺為臟宗故承喉而居後也

肺聲也喉管篇也心樂也舌調之者也言樂之成也

氣食津三竅并關於口溺精二竅并關於外腎上下照管各有其應

人之初生資水以成臟腑之中腎先成於三月既生而飲乳三十二日一變蒸先生腎氣水之功用至矣哉

古臟圖咽在喉之後歐圖喉在咽之後此疑端也然以
手摩頸而測之則胃管分明在前歐圖似是
咽管在前而納穀食之滋味者陽之道也肛門處後而
出穀食之滓穢者陰之道也

肺以生氣心以生血故臟腑之系通於心肺自相灌輸
則系非是頑肉而中空通似竹管歟

脊骨比木之榦宅之樑故五臟皆近於背而心系腎系
俱著於脊豈非重歟

單驥言古說左腎其腑膀胱右腎命門其腑三焦丈夫
以藏精女子以繫胞以理主之三焦當如膀胱有形

而王叔和言三焦有臟無形不亦大謬乎謂之三焦者何也分布人體中有上中下之異方人心湛寂意念不起則精氣散在三焦榮華百體及其慾念一起心火熾然翕撮三焦精氣入命門之府輸瀉而去故号此腑為焦耳徐遁見飢死人臟腑右腎下有脂膜如手大者正與膀胱相對有二白脉自其中出夾脊而上貫腦意此即導引家所謂夾脊雙關者而不悟脂膜如手大者之為三焦也黃帝書曰上焦如霧中焦如漚下焦如瀆扁鵲曰焦原也為水穀之道路氣之所終始也上焦在心下下膈在胃口上中焦在胃

中脘不上不下下焦在臍下當膀胱上按單徐兩言
頗似有埋黃帝霧滙之論不可舍棄意者有有形對
膀胱之三焦不必泥於三字亦有霧滙無形之三焦
依扁鵲之說三處分排耶三焦既在臍列則有形余
故疑有形之三焦一而無形之三焦三耳且藏精繫
胞有炁然後可也若無形則命門一小塊肉安得傳
野色育哉然旣曰繫胞則又有一胞若膀胱者繫于
命門乎胞門所謂奇恒之府也然則不可強以三焦
為有形也脉經則不以三焦為命門之腑而胞門予
戶廼其腑也

以五臟位次而言之脾居中央以腹之部內言之腎居中央自蔽骨鳩尾至毛際曲骨皆腹也臍恰居中間直北與腎相望大抵人之初成形河車先凝其中一莖突生是為臍蒂臍蒂中有一點精血是為腎次蒂為脾為肝是腎與臍相為表裏對冲也

臍蒂中先生腎既成形鮮婉而臍蒂始乾落此如果蕊結實先生蒂而具花瓣蒂端已含如粟大實實既爛熟蒂始謝矣

甲乙經曰腎者引也能引氣通于骨髓左傳鄧三錫勸鄧君殺楚文王曰若不早圖後君噬臍註齊臍同按

腎非獨引氣通骨髓亦能引臍為對位也臍直與腎齊位故字從齊也

臟腑皆稟五行其發榮亦各具五行如肺屬皮毛毛之燥銳似金心屬血脉血之色赤似火脾主土肥肉似之肝主木筋膜似之腎主骨髓髓象水也此正稟也然亦莫不居一而具四如肺毛之燥銳稟金之正也其豎直似木其色黑似水其尖森似火其長養似土以類推之無不然也

有賦與之定故腎有命門有運用之妙故臍為神闕
鳳山氏業農目不知文而粗通訓民正音家有小學諺

解欣然合于心凡行止言語準此為之與妻相約出入必相拜敬對跪坐日讀談解鄉隣共嘲笑大駭目之狂病或指為餓死法猶堅定不搖夫鳳山海陬也自昔俗麤厲強力悍性服農賈尤健者習控大弓取武舉稱讀書者蓋罕焉是民素無見聞忽感心自飭躬於粗鹵之中不亦卓哉

江界白生銀冶也製釵環刀室較族匠精巧必整冠跪坐椎鑄之不貳價糊口而止亦不勞煩有時拱手發浩歌聲激越夜必著書或哦詩錄于冊無汲汲之求戚戚之憂其隱於匠者歟彼众匠朝夕同厥業安知

其人乎哉

廣州古邑閔生者養生家也老而骨癯勁稜如瘦鶴自言童子時善啖飯脹脹而猶不已醫言日減一匙積漸久之只數匙而不覺飢及年踰二十仍讀修鍊之書有時不食然氣虛則病加於平人故數匙常食外或之氣啖棗柿數枚或酒數勺不病矣亦導引吐納嘗曰鶴能導任脉之氣故一舉千里而不飢吾學此也有二子亦教其術云

郭玉者三和人旨也性聰敏日往書堂使人讀小學端坐而聽成誦無滯能踐履事其母誠孝備至又常學

卜曰易者卜之宗也亦聽以知其理誦其言也聞歌
笛轟朝則喜色見乎衣巾抵掌快笑真盲之豪也與
任希壽故承旨瑋子也小字希男矚目娟秀如婦人文
藝夙就西元通神年十七死有傳神帖三卷皆一時
名士像也年幼未嘗多見人士其父遭艱時達官未
吊希壽從座右竊識之又行路逢聞人輒歎家貧不
能具丹青率以漫墨設色皆若寫生姜豹菴世晃自
寫其真屢易本不稱意乃就希壽希壽於顴頰間略
加數筆絕似之姜大歎服元洗馬繼孫嘗言李彥瑱
之詩與任希壽之画可謂近世第一云噫彥瑱亦二

十七死才固不祥也甚矣

金洪器學修鍊者也年可五十餘而貌甚清臞平生未嘗近色有一子蓋一媿而生者也性喜遊山水不數日在家日行數百里而鞋若新暑不汗寒不粟噉飯數匙可支數日然不食油醬魚肉嘗齋十文錢入金剛山數月乃返猶餘數錢夜半起坐振動骨節磔磔有聲好與名僧遊其入上乘者曰首座曇和舊居太白今注星州素不解字而臨經講說無不通曉跣足行大雪中有尚疾師者亦龍象之雄也方卓錫金剛故洪器亦欲往與結交然家貧妻子為累不成其志

為恨云

刑曹書吏池受行者習禮學人也成士執大中與之親
士執嘗曰談古禮如指諸掌以至家禮以後儀文之
多誤慨然興歎綽有古人風又歷舉閭巷間奇士金
維城能詩平生不看盛唐以後書尹有城固窮讀書
深居不出敬粟谷書如魯齋之於小學崔景燮博學
能文雙坐塵金姓者晚達兵家洞口內笠匠某病痿
而善詩云

順天松廣寺有土窟可容一身僧作戶開閉有趙生者
老而奇常戴笠巾背負書帙來留其中僧時與一食

日夜窮究其書人莫測也有時擔書出去莫知其跡
忽又條然而來人謠曰土窟趙生噫其隱君子歟後
聞僧證旰言趙生善欺人

卞弼才忠州優人也自弼才溯其祖凡六世孝子弼才
之子年若干歲天性近道動遵規矩儼如老成異哉
忠州洪有輔子快宗幼有慧性欲博觀書籍長者禁之
快宗年八歲忽不知所所在凡二日延於藏書樓中得
之恣觀書籍仍忘其飢自此文學夙成冬月之朝忽
見籬間有癯僧蹲踞于地渾身曉霜皚皚仍呼入室
中煮粥與之僧言譚灋落無所不通與快宗相上下

甚相得也時快宗年十三歲也凡一宿僧起去於宿處落一紙有詩曰距海丹峯路八千飛飛應向敕雲邊小僧亦是人間物將見襄陽下馬年其辭未知何語也或言其兄之前程歟未可知也快宗今十六歲云

慎敦行山陰縣吏子也幼就學於山陰慎侍直文才夙成學行又高年既壯見士夫必拜於廳下士夫為之敬待嘗舉初試上京赴會試將錄名同事人書幼學臣慎敦行敦行見之急改之曰貢生臣人或詰其固執敦行曰幼學士夫所稱也我鄉民也安可不正其

名以欺吾 君乎其言行皆類此

西湖金娘夙慧能文家貧瀟丐於村舍年二十三猶未
嫁嘗於一室與其母寢丁亥春強暴來侵娘斫指染
血書鼠牙穿屋蛾命撲燈八字投水而死經三日浮
顏色如生

丙戌七月日本渡海舡淹沒百餘人死之惟一梢工見
舡磔然將解意入艙底負造果橫纏於肩而已舡拆
遂乘一板而浮詳見舟覆始末譯官玄某與其孫一
僕一又有同行數人同乘一板玄某之孫忽墜水死
年十七也玄某大叫一聲仍氣絕其僕被髮發喪擲

踊大哭繫玄某尸於板上恐其沉也同載人以其板
窄難容割其繫推尸于海僕力弱不能挽梢工板風
引急過不見其畢竟之如何梢工連飡造果凡幾日
還泊東萊噫玄氏之僕忠而知禮也梢工亦有智也
朴鵬達吏曹書吏之子也早孤有志於學嘗假病藥之
說以自箴曰賤疾心狹而多窒氣躁而不固陽溢而
亢貌峭而乖智昏而有蔽神滯而露拙或銳進而鮮
根持或溺玩而喪本實重以行僻■而趨險自眩於
神奇自稍長微有其崇不至甚矣自勝冠以後諸症
漸增動靜語嘿之間種種發作已成痼疾及今不治

將不可復爲伏願良師特發奧訣調溫涼之劑適平
峻之性君臣佐使補瀉惟宜快去病根以成完人千
萬幸甚自命藥曰矯氣反性丸弘毅恭和通鍊敦樸
平易各五兩右五材采于無極之中和以浩然之氣
方寸器鍊養大膽一部江漢水陶濯去滓糊丸麤拳
大秋陽曝乾清明湯嚼下不拘時吾家心溪嘗遇於
宮村金直齋家

山房隨筆載薛制機言有賀自長沙移鎮南昌者啓云
夜醉長沙曉行湘水難教掃蕩之留朝飛南浦暮捲
西山來聽佩鸞之舞上巳請客云三月三日長安水

邊多麗人一觴一咏會稽山陰修楔事又云良辰美景賞心樂事四者難并崇山峻嶺茂林脩竹羣賢畢至此是縛席手段不可多得我國沈齊賢乞酒啓有曰月白風清良夜何天朗氣清是日也亦用此法甚妙

萇弘死於蜀三年血化為碧意血非化碧者碧即寶也漢宣帝時方士言益州有金馬碧雞可登祀而致顏師古注金形如馬碧形如雞云蓋碧蜀產也偶得碧而為血所化歟

宋岳珂著程史嘗未知程字之義按說文程牀前几也

時韞
字也

松
下
落
田
字

南遂安玉癸未以製述官入日本牛窓并潛持而韻律
求和時適夜矣時韞二夏始草手不停筆篇訖鷄未
鳴矣潛驚其神速使行未及江戸詩已先到矣江戸
松田老人年八十餘自言四與於儔會間申青泉安
否時韞臨席和其詩曰四閱天西博望浮靈光獨立
海中州白揚已宿青泉墓霜髮重迎本願樓松田為
之垂涕時韞又和曰四十六年前度客盡將花筆記
仙樓松凄然而止林信言世掌文職駭而自用使行
遲速係於回荅書而書出於其手一行深以為慮適
信言書記久保泰亨者以文事見時韞和其詩曰林

發下落時字

君獨掌裨謨會早向公門彩筆橫泰亨書牘尾以示
曰謹以誠意歸傳於大學頭未幾回答書來使行速
發韞有力焉文章之動人如此而時韞之才誠不可
及也成士執與南同入日本目見其事為余言之如
此時韞南字也青泉申維翰號也

西北隅石墻余洩處也墻有香鼠穴香氣外漏每洩時
掘鼠為腊之心必生旋思殺物為戒日日如是而未
快去也勉之不已今才斷却殺心寂然不起此不屑
之機心於大處能勉否乎噫

陶菴講學寒泉每清朝諸生冠帶齊會於庭槐下行相

揖禮向堂甫竣先生謁祠而出坐於堂諸生始上堂
先生乃高聲誦義理之心傾刻不存人道息凡三遍
諸生肅然恭聽始次第講小學詩經訖又各以日課
或庸學論孟或濂洛諸書講學廼罷又各修其日講
說以進則先生手自塗抹整頓以賜日日如是

柳下洪世恭嘗與陸席龍為友每謂席龍曰汝名呼之
甚不吉急改之也席龍後竟伏誅柳下老來手自刪
定其詩枕中貯白銀七十兩嘗誇視諸門生曰此後
日刊吾集資也汝輩識之噫文人好名自古而然也
今人人雖爛誦其詩柳下耳朶已朽安能聽之既歸

之後雖繡裝玉刻不可喜也雖火燭水壞不可怒也
寂然無知又何論其喜怒哉何不生前把銀作七十
塊沽猪肉白酒為七十日喜歡緣以澆其一生枯腸
也然梅月堂作詩輒投水近日李彥瑱生前焚半藁
死後殉葬半藁與此翁雖異其不畏泯滅與圖不朽
亦可任他所好而已何必譽瑜而毀玦哉

栗谷生於江陵烏竹軒擊蒙要訣手草尚在三淵詩曰
几閣猶留要訣草試看心畫摠精神

余有辨急之性每務寬裕然見不是處不覺峭露旋又
悔愧急觸事端萌兆時猛以寬厚含包等字念念鎮

心頃刻則都無事受用甚廣然預防極難余晝夜猛省者也

凡痰病活吞細川魚一次三二十箇日二三度五六日積痰皆解云

伋字說文無它義只曰人名孔伋字子思無乃伋字有思之義耶孔子弟子燕伋亦字思則伋有思義丁寧也秦火以後字義湮滅蓋不勝矣

古人名字皆有意義以孔門諸弟言之說文淵字回水盤旋貌則顏子名字蓋取此藏同點小黑也黑則欲其白也故曾蒧奚容蒧俱字皙狄黑亦字皙噲喉也

顏噲字子聲樂欬字亦子聲哆張口貌張不可以不
歛故漆雕哆字子歛坤卦曰括囊無咎括有包容之
義故南宮括字子容路可以由故季路名由顏無繇
字路里可以處故后處字子里此其大槩也其餘滅
明之子羽高柴之子羔之類義不可通者多在楚書
中故也

近世茂朱民於山缺處得石匣中有鐵椎刻曰漢元梵
回今在龍山趙某家雖剝落甚精巧人或以為漢人
姓名然漢時本無梵字縱有之漢物安得匣埋於淺
朱耶意者望氣人厭勝之類且符呪有元梵會莫等

文此亦無乃其流耶或是道說無學輩之所為耶天地間不可知之事甚多

敬易衰於至親近處故禮尤別於閨門生民之大防也今俗於夫婦甚無禮節一醮之後渾無拜揖至叔嫂相拜妻則在嫂列而偃然不拜是宜禮也中國亦有此風沈龍江文雅鄉約曰鄉俗于禮文病繁惟夫婦最略或至有經年不相揖拜者狎故也豈知禮在狎處尤不可少只觀初親迎至合巹於諸禮何所不備乃日久而遂忘之耶

近日覺日課讀書有四益廣博精微通達古昔資輔志

寸不與焉一畧略飢時讀聲倍朗潤味其理趣不覺其飢也二稍寒時讀氣隨聲而流轉體內適暢足以忘寒三憂慮惱心時讀眼與字投心與理湊千思萬念有時消除四病咳時讀氣通不觸漱聲頓已也如其不暖不寒不飢不飽心地和悅體幹康安加以以燈紅窓白晝帙精覈几席明潔則可不勝其讀矣况兼之以志高才達年少氣健之子不讀復何為哉凡吾同志勉之勉之

日授童子書早起飲啖而讀則口鈍不成讀不以則倍利快屢識屢然意食氣壅滯清明之氣而然也

磁石之與鐵相感捷於影響余嘗持磁石搖之於子午
盤上數尺則盤中鐵隨而旋甚異其覆以琉璃無罅
隙可通氣而如此試握在拳中而搖之亦然又深藏
石於木櫃中試之亦然又以石硯隔盤以匱試之亦
感應甚速數客在座莫究其理異哉此不過一誠字
史記酷吏傳杜周為廷尉二千石繫者新古相因不減
百餘人郡吏大府舉之廷尉一歲至千餘章章大者
連逮證案數百小者數十人遠者數千近者數百里
此數十始下人字數千不下里字好文法也

聖人經書已經孔子手定後人不可任自增削只檢校

篇卷按覈字義敬守而勿失不害為聖門忠臣後世
模擬經書甚非宜也晉廣陵相孔衍刪漢魏諸史取
其美詞典言纂漢魏尚書二十六卷隋秘書監王邵
錄開皇仁壽時事尋其義例皆準尚書王仲淹續經
意倣此而為之朱子譏其摭拾兩漢以來文字言語
之陋切名事業之卑依倣六經強而躋之二帝三王
之列云者切中其病夫漢雖不及三代猶可言也彼
魏隋纂奪何與於典謨誓命哉且仲淹有修飾之工
雖不量力自為刪述猶可說也彼孔衍王邵果何人
哉然我嘗見世說評李卓吾又敢譏朱子之責仲淹

何哉晉著作郎樂資采戰國策及太史書撰春秋後
傳其始以周貞王續前傳魯哀公後至王赧入秦又
以秦文王之繼周終於二世之滅合成卅卷此書雖
未知經亦摸倣而其傳也則亦何害哉雖立經而筆
法乖舛則亦取西帝之誚耳朱子綱目直擬經傳而
甚正大羅景綸以為隣當再出非虛語也後世持論
正直者連脩綱目可也如我國李氏玄錫所撰皇
明綱目亦恐不恃耳自有中國之真儒起而秉筆抽
名山秘藏采天下之稗官野錄名賢文集編摩是非
綱擬經目依傳以成一家必有可觀生於偏邦書種

不繼只以明紀編年通紀記一事本末等數種編成
正史恐多踈畧耳然其立書法凜然可敬陳于陛曰
五經易禮之外詩書春秋皆可續如祖父在前有所
著述使其子孫能承其意而行續之則為祖父者喜
悅之不暇云余以為聖人之言為經代非三代人非
孔子則皆非經也上天下地往古來今經自經而已
不可續也無限病根從續經二字出春秋屬於史故
若有賢人則代代從其法可也詩則采詩之法已亡
世愈下體製判異且博而難精不可摸倣若從朱子
之言則可也朱子答鞏仲至書曰古今詩凡三變自

漢魏以上為一等自晉宋間顏謝以後下及唐初為一等自沈宋以後定著律詩下及今日又為一等然自唐初以前為詩者固有高下而法猶未變至律詩出而後詩之與法始皆大變無復古人之風矣嘗欲抄取經史韻語下及文選漢魏古詞以盡郭景純陶淵之作自為一篇而附三百篇楚辭之後以為詩之根本準則又於其下二等之中擇其近於古者各為一篇以為羽翼興衛其不合者則悉去之不使接於耳目入於腦次要使方寸之中無一字世俗言語意思則其為詩不期於高遠而自高遠矣禮則代有典

章各自為書亦不可摸三禮明主良臣可以斟酌易則揚子太玄司馬潛虛各立名目州部什刃似涉摸擬耳

詩雖少技取意甚廣三百篇感發懲創尚矣至唐律出而意思慘澹如東濕薪有古心者頗鬱鬱不樂楊仲弘云凡作唐律起處要平直承處要蒼容轉處要變化結處要淵永上下要相聯首尾要相應最忌俗意俗字俗語俗韻用工二十年始有所得意此商榷法也詩人不可措手足矣人巧既極天機顧安所活哉忌四俗真藥石然二十年勞精可憐其心應如掬

泥九矣未知楊仲弘詩果何如我似不及杜少陵
嗚呼少陵不如是跼蹐矣

余體羸弱凡百事為或過分則汗流息喘親知及族黨
尊丈愛我戒文思太鉅利務作久遠質厚語戒戒
劬書太勞務少撙節醫家勸多服補中益氣湯戒勸
多讀養生書學導引吐納法尹聖文嘗曰子骨清文
清心清為子憂之今見骨格比前日少勁憂暫釋矣
余每自笑三清非余本色下得三弱字似好矣成士
執嘗曰骨少肉多者無名有福肉少骨多者有名無
福子其戒之余每感諸公慮我甚勤時作叩齒闔眼

法多得利益又看書逢奧義難解背契頭痒心地煩
促則拋而不思夜讀不過三更無味則止安步而行
不出三四十里食不至霍亂又守古人四不出避風
如避箭之戒且不食河豚羹無名苗不涉敗橋春冰
不臨危崖斷壑犯筆不作危險悖惡語又每畏酒狂
色鬼之甚惑也斯其大畧也然諸公何不以心地上
事戒之乎余於古得二人以事之孫公談圃曰林英
年七十氣貌不衰或問何術致此英曰但平生不會
煩惱明日無飯喫亦不憂事至則遣之釋然不留腦
中石林燕語曰文潞公致仕年幾八十神宗問卿攝

生亦有道乎對無它但能任意自適不以外物傷和
氣不敢做過當事酌中恰好即止

漢擘山新晴之日遙望江南界則申方天外有山如火
脫松江府金山界而浙商所傳也山東界或亥間且
有島嶼而不可識也

磨堯堅三字見酉陽雜俎朱子論之宋濂嘗作銘蓋慎
勿言之意也而如古金人三緘也余嘗書其下曰湛
人聰根盡吾慧寶揭于壁諸書皆在堅雜俎作韃

鰲今之眼鏡也南藥泉自少時著眼鏡至老反不用
而眼不似昏蓋少者可用

一日與徐汝五言處謗之道汝五曰無根之謗無所傷
也土塑木偶有何知識然饒舌者必指摘其面曰目
如許口如許紛紛談說而木偶土塑無傷

青莊館全書卷之五十一

已巳秋
民城盛汝書之





